

Jeta e Krishtit

Vëllimi 2

JU LUTEMI VINI RE!

Vizualet për këtë seri mund të blihen në pjesën më të madhe të zyrave të BUF-it dhe në dyqanet në internet. Për një listë të zyrave të BUF-it dhe dyqaneve në internet në Evropë, ju lutemi vizitoni www.teachkids.eu/al dhe kliko mbi “Vendet”.



Copyright © 1999, 2010 Child Evangelism Fellowship® Inc.

Të gjitha të drejtat e rezervuara. Përdorur me leje.

Mund të riprodhohet vetëm për përdorim personal, shërbese, jofitimprurës ose jo-komercial. Vizitoni www.teachkids.eu/al për më shumë detaje mbi lejen e përdorimit.

PASQYRA E LËNDËS

Shënim: Vëllimi i parë i kësaj serie përmban mësimet nr.1 deri në 6.

Mësim	Faqe
1 Mrekulli në një dasmë	
2 Një fillim i ri i jetës	
3 Një grua në Samari	
4 Zoti shëron një djalë, por nuk pranohet në qytetin e lindjes	
5 Bartimeu i verbër rimerr dritën e syve	
6 Një grua u shërua dhe një vajzë u ringjall	

Parathënie

S'ka detyrë më të lartë për mësuesin se sa t'u paraqesë fëmijëve Personin dhe Punën e Zotit Jezus Krisht. Ai është Rruga e vetme tek Perëndia; Ai është tema e madhe dhe çelësi i Shkrimeve të Shenjta. A nuk tha Ai: "Shkrimet e Shenjta ... dëshmojnë për mua" (Gjon 5:39)?

Në këtë vëllim të dytë për jetën e Krishtit, ne duam të paraqesim disa nga ndodhitë dhe mësimet në pjesën e hershme të shërbesës publike së Krishtit. Duke paraqitur Shpëtimtarin tonë të lavdishëm tek djemtë dhe vajzat e grupit tuaj, ju keni një lutje të dyfishtë: që ata që janë akoma të pashpëtuar të drejtohen e orientohen për të besuar tek Ai; dhe ata që tashmë janë të shpëtuar të rriten në hirin dhe diturinë e Tij dhe të bëhen sa më të ngjashëm me Të..

E Vërteta Qendrore e çdo mësim

Një "e vërtetë qendrore" jepet në çdo mësim. Është e rëndësishme të mësohet plotësisht mësimi kryesor nga pjesët e Biblës, dhe jo vetëm të tregoni fakte interesante rreth jetës së Krishtit. Ne duam që fëmijët do të dalin nga mësimi duke njohur çfarë do Perëndia t'u mësojë, sidomos nëpërmjet asaj pjese të veçantë të Fjalës së Tij dhe që ata do të vënë në praktikë në jetën e tyre të përditshme. Shkurtime të më poshtme do t'ju ndihmojnë ta mësoni dhe ta zbatoni të Vërtetën Qendrore:

VQ = vendi ku mësohet në mësim e Vërteta Qendrore.

P = zbatimi bëhet tek fëmija e pashpëtuar.

S = zbatimi bëhet tek fëmija e shpëtuar.

Është mirë që të Vërtetën Qendrore fëmijët ta lexojnë në një copë letre që të vendoset në një tabelë.

Këshillimi i fëmijës që do të dijë më shumë rreth rrugës së shpëtimit.

Në çdo mësim jepet sugjerim si ju mund të rri në dispozicion të fëmijëve për t'i këshilluar ata. Shkurtime të më poshtëm përdoret për të treguar se në ç'pikë kjo përfshihet në mësimin aktual:

RDK = Rrini në dispozicion për të dhënë këshillë.

Orientimet e më poshtëm ndihmojnë për të këshilluar një fëmijë rreth shpëtimit:

1. Përmbledhje e Hapave që duhen bërë për të Këshilluar Fëmijën që do të Vijë te Krishti.

(mbaj në Biblën tënde)

2. Sigurohu që fëmija kupton që:

Perëndia

Kush është Perëndia?

Perëndia na krijoi.

Ai flet me ne me anë të Biblës.
Perëndia është i shenjtë dhe i pastër.
Ai na do.

Mëkati

Ç'është mëkati?
Mëkati është mosbindja ndaj urdhrave të Perëndisë.
Është kundër Perëndisë.
Fol për mëkate të veçanta.
Fëmija është një mëkatar.
Mëkati meriton të dënohet.

Shpëtimtari

Kush është i vetmi Ai që mund të ta largojë mëkatin?
Pse mundet Ai ta largojë mëkatin?
Perëndia Bir vdiq në kryq për mëkatarët.
Zoti Jezus u ringjall.
Ai është Zoti i të gjithëve.

3. Shpjego Si mund të Shpëtosh

4. Shpjego ç'kërkon Zoti nga ne të bëjmë, dhe ç'do të bëjë Ai.

5. Përdor një varg nga Bibla.

(Gjoni 1:12; 3:16; 6:37; Veprat 16:31; Romakëve 6:23 ose 10:13).

Ç'kërkon Zoti që ti të bësh?

Çfarë do të bëjë Zoti?

6. Paralajmëro për vështirësitë.

7. Pyet: "A do t'i besosh Krishtit, apo do të presësh?"

Inkurajoje fëmijën të lutet me zë të lartë (në qoftë se është gati).

8. Fol për Sigurimin e Shpëtimit

Kthehu tek vargu i Biblës që përdore.

Fol për një jetë të ndryshuar.

Tregoji se çfarë mund të dijë një person që me të vërtetë beson tek Krishti.

9. Jep (më vonë) disa Këshilla për Jetën e Krishterë

Lexo dhe bindu Biblës sate.

Foli Perëndisë, Atit tonë Qiellor.

Tregoji të tjerëve ç'ka bërë Zoti për ty.

Kërkoji Perëndisë të të falë kur mëkaton.

Takohu me besimtarë të tjerë.

Mbaj mend se Zoti premtun: "Unë kurrë nuk do të të lë."

Mësimi 1

Mrekulli në një dasmë

Shkrimet:	Gjoni 2:1-11
E Vërteta Qendrore:	Zoti Jezus është i plotfuqishëm.
Zbatimi:	Të pashpëtuar: Besoji Atij të të shpëtojë. Të shpëtuar: Besoji Atij për të gjithë problemet.
Pikat kryesore të mësimi:	
Fillimi:	Lumturi në Kana.
Zhvillimi i ngjarjeve:	Përgatitjet e dasmës. Ftohen Zoti Jezus dhe dishepujt - VQ1 Arrijnë mysafirët. Vera mbaron - VQP2 Maria i tregon Zotit Jezus për problemin. Jezusi qorton Marinë - VQS3 Maria u thotë shërbëtorëve të bëjnë çfarë thotë Jezusi. Jezusi urdhëron shërbëtorët të mbushin enët me ujë - VQS4 Shërbëtorët binden, dhe uji bëhet verë - VQP5 (RDK)
Kulmi:	Drejtuesi i thotë dhëndrit. "Kjo është vera më e mirë nga të gjitha".
Përfundimi:	Dishepujt besojnë tek Krishti - VQS6 VQP7
Vargu përmendësh:	<i>Filipianëve 2:8</i> <i>"Dhe duke u gjetur nga pamja e jashtme posi njeri, e përuli vetveten duke u bërë i bindur deri në vdekje, deri në vdekje të kryqit."</i>

Shënim:

Kur ju jepni mësim, mund të dëshironi të mënjanoni pyetjen se pse vera përdorej në dasmë, sepse mund t'ju largojë nga qëllimi kryesor i mësimi. Po të kenë pyetje fëmijët për këtë, ju mund ta trajtoni atë nga baza individuale. Mund të thuhet se vera ishte jo e fortë e që përmbante pak alkool. Vera pihej dhe akoma pihet në shumë vende për shkak të papastërtisë të ujit natyral.

Mësim

Çfarë gëzimi ishte në Kana! Do të bëhej një dasmë. Jam i sigurt se planet ishin bërë disa javë më parë ditës së dasmës në shtëpinë e nuses edhe në shtëpinë e dhëndrit. Qepeshin kostumet e dasmës. Kishte plane për ushqimet e dasmës. Sa ushqim nevojitej? Sa verë iu duhet të blinin? Kush duhej të ftohej për dasmë?

Më në fund dita arriti. Të gjitha rregullimet u bënë dhe çdo gjë ishte gati. Miqtë ishin duke ardhur.

(Figura 1-2)

Qenë ftuar Jezusi dhe dishepujt e tij. Ndoshta familja që bënte dasmën kishte lidhje me familjen e Zotit Jezus, sepse nëna e tij, Maria, ishte gjithashtu e ftuar. (*Derisa Bibla nuk e përmend Jozefin në këtë kohë, është ka mundësi që ai të kishte vdekur*).

Ndërsa Jezusi dhe nxënësit e Tij morën rrugën e gjatë tërë pluhur, mezi po prisnin për një ditë të këndshme. Sikur ta kishit parë grupin e burrave që ecnin në rrugë, nuk do të mendonit se njëri ishte i ndryshëm nga të tjerët. Cili ishte i ndryshe? Po, Zoti Jezus Krisht, patjetër! Ai nuk dukej i ndryshe - Ai ishte një i ri si gjithë të tjerët.- Por Ai ishte gjithashtu Perëndia - Biri i vetëm i Perëndisë - sepse Ai vazhdoi të jetë Perëndi edhe kur Ai u bë njeri. Në këtë moment, dishepujt e Tij nuk e kuptuan që po ata

ecnin pranë Atij që kishte krijuar botën, diellin, yjet dhe planetët. Ai që ata shoqëronin është i gjithëpu-shtetshëm, Biri i plotfuqishëm i Perëndisë, që mund të bëjë atë që dëshiron Ai. Dishepujt nuk e kishin kuptuar këtë akoma; por ata e dinin që kishte diçka të veçantë rreth Jezus Krishtit dhe ata ishin të lumtur të shkonin me atë në dasmë.

(Figura 1-3)

Kur erdhën të gjithë mysafirët, ata ndaluan pranë shtambave të mëdha me ujë. Meqë rrugët dhe rrugicat ishin me pluhur dhe njerëzit kishin veshur sandale, këmbët e tyre ishin tërë pluhur dhe të ndotura. Një shërbëtor qëndronte pranë shtambave me ujë të lante këmbët e tyre. Ishte një rregull në këtë vend për larjen e duarve, çdo person duhet të lejonte shërbëtorin t'i hidhte ujë për të larë duart, edhe sikur ai t'i kishte duart e pastër. Shërbëtorët kishin nevojë për enë të mëdha me ujë që gjithë njerëzit aty të mund të lanin duart dhe këmbët.

Gëzimi po shtohet shumë. Më në fund ushqimi ishte gati për t'u shtruar. Pjata të mbushura me gjellë speciale kaloheshin nga njëri tek tjetri. Gotat me verë mbusheshin nga qypa të mëdhenj vere. Njerëzit vazhduan të vinin gjithnjë e më shumë.

Dasmat në atë vend ishin shumë të ndryshme nga dasmat tona. Këndoheshin shumë këngë dhe kërcëheshin shumë valle nga krushqit nëpër rrugë, kur nusja shkonte në shtëpinë e dhëndrit ku bëhej festa. Shumë shokë dhe fqinjë ftoheshin në dasmë dhe shpesh festa zgjaste disa ditë. Kishte nevojë për shumë ushqim dhe pije dhe shërbëtorët ishin shumë të zënë për t'i shërbyer çdo njeriu. Herë pas here qypat e verës mbusheshin plot.

Një shërbëtor u kthye me qypin e verës bosh për ta rimbushur atë. "Na falni, s'ka më verë," i thanë atij. S'ka më verë! Ç'fatkeqësi! E tërë festa e dasmës do të prishet! Fjala në formë pëshpëritje kaloi nga një person tek një tjetër "s'ka më verë". Maria, nëna e Jezusit, dëgjoi këto fjalë. "Çfarë mund të bëhet?" mendoi ajo. Ajo s'mund të bënte gjë, por Djali i saj sigurisht mund të bënte. Ajo e dinte se Ai ishte Biri i Perëndisë; Ai mund të bënte gjithçka.

Maria kishte të drejtë. Zoti Jezus ishte i vetmi Njeri në atë shtëpi që mund të parandalonte këtë problem për të mos u prishur festa.

A mund të kujtoni pse Ai mund të ndihmonte? Po, Ai s'ishte tamam një njeri i zakonshëm si gjithë të tjerët në shtëpi. Ai është Perëndia - Perëndia Bir; Ai është i plotfuqishëm. "I plotfuqishëm" do të thotë se s'ka kufi për fuqinë e Tij. Ti dhe unë s'e kuptojmë dot kurrë sa shumë forcë dhe fuqi ka Ai. Ai ka fuqi të zgjidhë probleme që asnjëri tjetër s'mund t'i zgjidhë. Ai mund të bëjë gjëra që asnjëri tjetër s'mund t'i bëjë.

Në qoftë se ti nuk e ke besuar kurrë Zotin Jezus si Shpëtimtarin tënd, atëherë problemi më i madh për ty është mëkati yt. Ti ke lindur me dëshirën që të bësh gjëra të gabuara. A nuk do gjithmonë të fajësosh dikë tjetër për diçka të gabuar që ke bërë? Ndoshta ti u ktheve në shtëpi me një orë vonesë nga koha që duhej të ktheheshit dhe ti gënjeve dhe the se nëna e Xhoanës të kërkoi të qëndrosh për të luajtur me Xhoanën? Ti e di që kjo s'ishte e vërtetë dhe shpëtove nga telashi në shtëpi, por ti nuk iu binde Perëndisë. Ai të thotë ty të mos gënjesh.

Mëkati yt është shumë serioz, sepse të ndan ty nga Perëndia dhe ti je në rrezik të presësh lidhjet me Të për gjithmonë. A s'është ky një problem i pamundur?

Ti s'bën dot gjë; unë s'mund të ta zgjidh problemin dhe asnjëri në tokë s'mundet. Por kujtoni që ne thamë se Zoti Jezus Krisht është i plotfuqishëm. Asgjë s'është tepër e vështirë për Të. Bibla na thotë neve se Ai mund të largojë mëkatet e tua dhe ta bëjë jetën tënde të drejtë para Perëndisë. Ai vdiq në kryq dhe mori ndëshkimin e Perëndisë për mëkatet. Ai është gjallë sot, akoma i Plotfuqishëm, i Vetmi që mund të të bëjë të drejtë para Perëndisë.

(Figura 1-4)

Ai mund të bëjë gjëra të cilat asnjëri tjetër s'mund t'i bëjë dhe Maria e kuptoi këtë në njëfarë mënyrë. Ajo vrapoi te Djali i saj dhe i tha, "Jezus, ata s'kanë më verë."

Përgjigja që Zoti Jezus i dha Marisë na tingëllon e çuditshme deri në momentin kur kuptojmë çfarë do të thotë ajo. Le të lexojmë çfarë Ai iu përgjigj. Është shkruar në Gjon 2:4, "Ç'ke me mua, o grua? Ora ime

s'ka ardhur akoma!" (Ju mund t'i jepni një fëmijë ta lexojë këtë. Vendose këtë përpara se mësimi të fillojë).

Maria po përpiquej t'i thoshte Zotit Jezus të bënte diçka për verën. Ai nuk ishte i pasjellshëm me të, por Ai i tha asaj me vendosmëri të mos i tregonte Atij se kur mund të përdorte forcën e Tij. Ai ishte Biri i Perëndisë dhe vetëm Perëndia Ati e udhëhiqte Birin e Tij për atë që do të bënte. Ky ishte një mësim që duhej të mernte Maria. Zoti Jezus do të përdorte fuqinë e Tij, jo sepse Maria e kërkoi, por sepse Perëndia, Ati i Tij donte që Ai ta bënte këtë. Ai do të vepronte vetëm sipas dëshirës së Atit të Tij. A je përpjekur ndonjëherë t'i thuash Zotit Jezus se çfarë të bëjë? Ndonjëherë djemtë dhe vajzat e Krishterë bëjnë ashtu. Ndoshta ke një problem dhe e di çfarë dëshiron që Zoti të bëjë për atë. P.sh., mësuesi yt në shkollë nuk beson tek Zoti Jezus dhe thotë se Bibla s'është e vërtetë. Ndoshta ti je tunduar të lutesh: "Zot, me jep një mësues tjetër." Shpesh je lutur dhe shprehur tek Zoti Jezus duke i kërkuar se çfarë Ai të bëjë për ty, por prapë problemi mbetet aty. Ç'duhet të bësh? Cila është përgjigja e saktë?

a) Mos u lut më dhe prit për Atë të bëjë diçka.

b) Vazhdo të lutesh dhe t'i tregosh Atij se ç'duhet të bëjë për ty.

c) Vazhdo të lutesh dhe t'i tregosh Atij rreth problemit tënd, por kërkoji Atij ta zgjidhë atë sipas mënyrës që Ai do dhe kur Ai do.

Përgjigja më e mirë është e treta. Vazhdo t'ia paraqesësh problemin Atij, sepse Ai është i plotfuqishëm, i gjithëpushtetshëm. Ai e di përgjigjen e duhur për problemin tënd dhe Ai do të të përgjigjet kur të vijë koha. Faktikisht, në këtë festë dasme, koha kishte ardhur për Jezusin të tregonte sa i fuqishëm ishte Ai.

Maria e dinte se Ai ishte i gjithëfuqishmi Biri i Perëndisë, kështu që u kthye te shërbëtorët (*ndoshta përsëri një fëmijë mund ta lexojë atë*) dhe u tha: "Bëni siç ju thotë Ai" (Gjon 2:5). Ajo nënkuptonte, "Po bëtë ç'thotë Ai, Ai do të zgjidhë problemin tuaj." Shërbëtorët u drejtuan nga Ai. Çfarë do të thoshte Ai? Ai vështroi nga të gjashtë shtambat e mëdha që ishin përdorur për ujë për t'i larë mysafirët. Në Gjon 2:7 ne lexojmë ç'tha Ai (*lexo Gjon 2:7*):

(Figura 1-5)

"Mbushini shtambat me ujë."

Shërbëtorët mund të kenë menduar, "*Do të jetë e çuditshme të mbushësh enët tani. Pse t'i mbushin enët me ujë? Mysafirët janë të tërë këtu; të gjithë janë larë; dhe ne duam verë jo ujë! A po e kupton vallë Ai për problemin që kemi?*" Zoti Jezus po e kuptonte dhe Ai do të përdorte fuqinë e Tij të madhe të ndihmonte.

Djem e vajza të krishterë, a s'është e mrekullueshme të dish që Zoti Jezus është i interesuar në çdo problem që ti ke; Ai kujdeset për ty. Ai do ta përdorë fuqinë e Tij që të të ndihmuar. Ndoshta familja jote nuk beson tek Zoti Jezus dhe asnjëri s'duket se po e kupton atë që ti beson. I plotfuqishmi Zoti Jezus Krisht është interesuar në problemin tënd dhe Ai do të të ndihmojë. S'ka asnjë problem tepër të vështirë për Të. Vazhdoni t'i shprehesh Atij rreth problemeve të tua. Lutu Atij çdo ditë dhe kërkoji të të ndihmojë. Ndonjëherë ke ndonjë problem, është mirë që edhe dikush tjetër të lutet me ty.

Unë dua që ta dish se kur ke një problem, unë do të jem i kënaqur të lutem për të. Ne mund të lutemi së bashku. Gjithmonë, në qoftë se ti ke dëshirë, mund të vish, dhe të më tregosh mua dhe të dy do t'i kërkojmë Zotit dhe do t'i besojmë Atij për ta zgjidhur problemin. Zoti Jezus ka premtuar t'u përgjigjet lutjeve të fëmijëve të Tij. Ai nuk ka premtuar që çdo gjë do të jetë e lehtë për besimtarët, por Ai premtton t'i ndihmojë ata. Ndoshta shpejt Ai do të shpëtojë dikë tjetër në familjen tënde. Ai do të përdor fuqinë e Tij t'ju mbajë ju besnik ndaj Tij. Ai do t'ju ndihmojë të jetoni jetë të krishterë në shtëpi. Ai dëshiron t'ju ndihmojë ju, pikërisht siç deshi të ndihmonte në festën e dasmës. Ja pse tha Ai të mbushin shtambat me ujë.

Megjithëse shërbëtorët e menduan si të çuditshme, ata zbatuan këshillën e Marisë dhe bënë ç'tha Jezusi. Ata mbushën çdo shtambë; duhej shumë ujë, mbasi secila mbante rreth 100 litra. Kur çdo enë u mbush deri në grykë, Jezusi tha, "Tani nxirrni një mostër dhe çojani drejtuesit.

(Figura 1-6)

(*Drejtuesi do të kishte qenë si njëfarë kryekamerieri, ose njeri i ngarkuar me punën e dasmës.*)

Shërbëtorët do të kenë hezituar, duke dyshuar pse duhej t'i jepnin ujë drejtuesit, por përsëri ata u bindën. Ata i mbushën enët e tyre nga shtambat e mëdha të ujit dhe s'mund ta besonin atë që panë. Ajo ishte verë! Ata kishin futur ujë në shtamba dhe doli si verë! Ajo ishte një mrekulli! Jezusi kishte

transformuar ujin në verë në një çast. Pse mundi Ai ta bënte këtë? Po, sepse Ai është Perëndia; Ai është i plotfuqishëm; asgjë s'është tepër e vështirë për Atë. Ai mund të bëjë çdo gjë. Ai mund të falë e të shpëtojë - madje mëkatarin më të madh në botë. Ai mund të të shpëtojë ty.

(RDK) Nëse kurrë nuk i ke kërkuar Krishtit të të shpëtojë dhe e kupton se ke nevojë për të shpëtuar, ti mund t'i kërkoesh Atij tani aty ku je ulur, ose pranë krevatit kur të shkon në shtëpi. Sidoqoftë, në qoftë se ke dëshirë të bisedoni me mua për këtë, unë do të isha shumë i lumtur të të ndihmoj dhe të të tregoj se si mund të shpëtosh sot. Pasi të kenë dalë të tjerët, eja në rreshtin e parë. Unë do të ulem e do të të shpjegoj më shumë si mund të shpëtosh.

Ndoshta ti e di që mëkati yt të mban larg Perëndisë dhe do që të jesh në marrëdhënie të mirë me Atë. Në zemrën tënde tregoji Zotit Jezus për këtë tani. Mund të përdorësh fjalë si këto: "Zoti Jezus, unë jam mëkatar. Unë s'mund të largoj mëkatet e mia; por unë besoj se Ti mund ta bësh. Të lutem, bëje atë për mua tani." Bibla thotë se " Prandaj edhe mund të shpëtojë plotësisht ata që me anë të Tij i afrohen Perëndisë." (Hebrenjve 7:25).

Kjo do të thotë se Ai do të të shpëtojë krejtësisht, s'ka rëndësi sa i keq je. Në qoftë se beson tek Ai me të vërtetë, Ai do të t'i heqë tërë mëkatet e tua dhe do të jesh në marrëdhënie të mirë me Perëndinë përgjithmonë. Kjo është mrekulli më madhështore se ajo që ndodhi në dasmë.

Drejtuesi i dasmës, duke shijuar dhe duke mos ditur asgjë se nga erdhi, nxitoi për ta gjetur dhëndrin. "Nga e gjetët këtë?" pyeti ai. Unë s'kam parë asnjeri të shërbejë me verë kaq të mirë në fund të dasmës. Në çdo dasmë tjetër, vera më e mirë shërbehet në fillim; kjo është vera më e mirë që kam provuar." Nuk është për t'u habitur! Ajo u krijua nga vetë Zoti Jezus, që kishte krijuar të gjitha gjërat në krijimin e botës (Gjon 1:3).

Shumë nga ata që dinin rreth kthimit të ujit verë do ta mbanin mend këtë mrekulli për tërë jetën e tyre. Ata kishin parë diçka që vetëm Perëndia mund të bënte. Jezus Krisht është Biri i plotfuqishëm i Perëndisë. Dishepujt veçanërisht panë se kush ishte Ai dhe i besuan Atij akoma më shumë. Djem e vajza të krishterë, a nuk jeni të kënaqur që Shpëtimtari juaj është i plotfuqishëm? Kur ju e dini se Ai mund të bëjë çdo gjë, ju inkurajoheni t'i besoni Atij shumë e më shumë. Ai do t'ju ndihmojë juve për problemet tuaja dhe do të bëjë gjëra për ju që asnjeri tjetër nuk mund t'i bëjë.

Ndoshta ti nuk e njeh Atë si Shpëtimtarin tënd. Nuk i ke kërkuar kurrë Atij të të shpëtojë nga problemi më i madh - problemi i mëkateve të tua. A s'do të vish tek Ai sot dhe t'i besosh Atij që të të largojë mëkatet? Po i besove Atij, gjithashtu do të kesh një Shpëtimtar të plotfuqishëm, Zotin Jezus Krisht. "Ai mund të shpëtojë plotësisht ata që me anë të Tij i afrohen Perëndisë" (Hebrenjve 7:25).

A do të vish?

Pjesëmarrje fëmijëve: Përgjigje për pyetje.

Përdorni një dërrasë të zezë ose letër dhe laps që të shkruani përgjigjet, që t'i shohin të gjithë. Disa përgjigje janë dhënë, por lista juaj do të jetë më e plotë.

1) Cilat janë disa probleme të tjera për të cilat Zoti Jezus i plotfuqishëm mund t'ju ndihmojë?

Përgjigjet mund të jenë:

- Detyra shtëpie të vështira
- Provimet e shkollës
- je i sëmurë
- je i vetmuar
- të tallin, etj, etj.

2) Si mund t'i ndihmojë Zoti Jezus të krishterët me detyrat e shtëpisë?

Përgjigjet mund të jenë:

Ai do t'ju ndihmojë juve

- të studioni mirë
- të përqendroheni në atë që keni për të bërë
- të pranoni dëshirat e Tij

3) Si i ndihmon Ai të krishterët kur ata janë të sëmurë?

Përgjigjet mund të jenë:

Ai mund të të ndihmojë të shërohesh sa më shpejt, në qoftë se ky është vullneti i Tij.

Ai mund të të ndihmojë të jesh i durueshëm gjatë sëmundjes.

Pyetje për të përsëritur mësimin 1

1. Ku e bëri mrekullinë e Tij të parë Zoti Jezus?
(Në dasmë në Kana)
2. Kush tjetër ishin në dasmë, përveç Zotit Jezus?
(Nëna e Tij dhe dishepujt)
3. Pse ishin vendosur shtambat e mëdha me ujë për mysafirët?
(Për të larë duart dhe këmbët e bëra pis nga pluhuri gjatë rrugës)
4. Çfarë problem i madh ndodhi në dasmë?
(U mbarua vera)
5. Te kush shkoi Maria dhe te kush duhet të drejtohem ne kur kemi probleme?
(Te Zoti Jezus Krisht)
6. Maria u përpoq t'i tregojë Zotit Jezus të bënte diçka për verën, por Ai i tha asaj se nuk i takonte asaj kjo punë. Pse?
(Jezusi vepronte vetëm sipas vullnetit të Atit të Tij)
7. Çfarë u tha Zoti Jezus shërbëtorëve të bënin?
(Të mbushnin shtambat me ujë)
8. Çfarë ndodhi kur ata shkuan të mbushnin enët e tyre?
(Uji qe shndërruar në verë - kjo ishte një mrekulli)
9. Pse qe në gjendje Zoti Jezus Krisht të shndërronte ujin në verë?
(Ai është Perëndia - Ai është i plotfuqishëm)
10. Ç'mrekulli është në gjendje të bëjë Zoti në jetën e djemve dhe vajzave, grave dhe burrave sot?
(Ai është i aftë të na largojë mëkatet dhe të na bëjë neve fëmijë të Perëndisë)

Mësimi 2

Një Fillim i Ri i Jetës

Shkrimet: Gjoni 2:13-16,23; Gjoni 3:1-16; Gjoni 7:44-52;
Gjoni 19:39-42; Numrat 21:5-12

E vërteta qendrore: Ju duhet të rilindni.

Zbatimi: **Të pashpëtuar:** Kërkoji Zotit të të bëjë një person të ri dhe të të çojë në familjen e Tij.

Pikat kryesore të mësimi:

Fillimi: "Ai është një njeri kaq i mirë." VQP1

Zhvillimi i ngjarjeve: Krishti pastron tempullin

Nikodemi vjen te Jezusi

"Ti je mësues nga Perëndia"

"Nëse një njeri nuk ka rilindur përsëri" VQ2

"Si?"

"Me anë të Perëndisë, Frymës të Shenjtë" VQP3

"Si?"

Historia e Moisiut

"Biri i Njeriut duhet të ngrihet" VQP4 RDK

Kulmi: Një ditë Nikodemi rilindi

Përfundimi: Jeta e Nikodemit ndryshon VQP5

Vargu përmendësh: *Filipianëve 2:9 "Prandaj edhe Perëndia e lartësoi madhërisht dhe i dha një emër që është përmbi çdo emër."*

Pamje ndihmëse

1. Ka vetëm pak pamje për të mbajtur interesin e fëmijëve gjatë bisedimit midis Krishtit dhe Nikodemit. Unë ju sugjeroj juve të përdorni "balona folëse" në figurat duke përdorur fjalët e dhëna këtu. Bëjeni mjaft të madhe që fjalët të lexohen lehtë në takim.

2. Ju mund të bëni figurën e gjarprit në një mënyrë të përshtatshme në qoftë se ju prisni me kujdes traversat e kryqit, siç është pikturuar këtu. Ngjyroseni gjarprin që të fshihet druri që nuk hiqet.

Si?

Si?


Besoni

Nëse një njeri nuk ka rilindur,
nuk mund ta shohë mbretërinë e
Perëndisë

Duhet të lindni përsëri

Kështu duhet të ngrihet lart Biri i njeriut

Me anë të Perëndisë, Frymës së
Shenjtë



Mësim

(Figura 2-1)

"Ai është një njeri kaq i mirë." Jam i sigurt se shumë njerëz e thanë këtë për Nikodemin. Nikodemi ishte një Farise. Farisenjtë ishin një grup njerëzish që jetonin në kohën kur Zoti Jezus ishte mbi tokë. Ata ishin shumë fetarë; ata shpesh bënë lutje të gjata në tempull, ata i jepnin dhjetë për qind të parave të tyre tempullit dhe gjithashtu jepnin shumë për të varfrit; ata kishin shumë ligje strikte, të cilat ata përpiqeshin shumë t'i zbatonin. Në fakt, ata dukeshin sikur ishin njerëz që me të vërtetë e donin Perëndinë dhe donin t'i pëlqenin Atij. Nikodemi s'ishte vetëm një Farise, por edhe një udhëheqës i tyre.

Njerëzve të tjerë, Nikodemi u dukej si njeri i mirë, për shkak të veprimeve të tij të mira. Por Perëndia e dinte mirë se si ishte ai në të vërtetë. Perëndia mund të shihte mirë se çfarë kishte në mendje dhe në zemër ai. Pikërisht si çdonjëri prej nesh, Nikodemi kishte lindur me natyrë mëkatore. Ai nuk e donte Perëndinë me gjithë zemër. Atij i pëlqente të vepronte siç ia kishte ëndja në vend që të bënte gjithmonë si donte Perëndia. Nuk ka rëndësi sa fetar ishte ai, kurrë nuk mund të ndryshonte natyrën e tij mëkatore dhe kjo vlen dhe për ty e për mua.

Ndoshta ti përpiqesh çdo ditë të jesh i mirë; ndoshta ti shkon rregullisht në kishë dhe thua lutje, por duke bërë gjithë këto ti nuk mund të ndryshosh me të vërtetë. Kjo nuk të pengon ty të kesh mendime zemërimi, apo të jesh egoist, apo të bëhesh xheloz kur nëna jote harxhon shumë kohë me beben e re në shtëpinë tënde. Pse je kështu? Ti je kështu sepse ti ke një natyrë mëkatore - ti ke lindur kështu. Ti nuk mund të bësh asgjë për të ndryshuar. Asnjë njeri në gjithë botën nuk mund të të ndryshojë. Vetëm Perëndia mund të të ndryshojë. Vetëm Ai mund të të kthejë ty në një njeri të ri. Ti kurrë nuk mund të ndryshohesh dhe të bëhesh mjaft i mirë për të kënaqur Perëndinë.

Nikodemi jetonte në qytetin e Jeruzalemit. Me siguri që ai kishte dëgjuar për Zotin Jezus, por ai akoma nuk e kishte takuar Atë.

(Figura 2-2)

Koha për festimin e Pashkës arriti, dhe Zoti Jezus erdhi në Jeruzalem. Pashka ishte një festë që hebrenjtë e kremtonin çdo vit. Kremtohej për të kujtuar se si Perëndia i kishte shpëtuar ata nga Egjipti qindra vjet më parë. Me mijëra njerëz udhëtonin drejt Jeruzalemit për të marrë pjesë në kremtime. Rrugët ishin të mbushura me hebrenj nga gjithë vendi. Njerëzit takoheshin dhe bisedonin me miqtë që nuk i kishin takuar prej një viti. Ata kishin shumë për të biseduar. Ndoshta shumë nga ata bisedonin për Jezusin dhe mrekullitë që Ai kishte bërë, dhe fjalët që Ai u kishte mësuar. Ndërsa Jezusi kalonte mes turmës, disa njerëz mund t'u kenë treguar miqve të tyre për Atë. Jezusi po shkonte në tempull.

Zona e tempullit ishte veçanërisht e populluar. Kishte njerëz në çdo vend. Këmbyesit e parave ishin ulur në tryezat e tyre. Ata kishin shumë klientë. Kishte një rregull që vetëm disa monedha mund të përdroreshin në tempull; kështu që këmbyesit e parave i ndryshonin paratë e zakonshme në para të tempullit. Shpesh këta këmbyes parash mashtronin për të bërë më shumë para për vete. Njerëzit e sotëm janë po aq lakmues dhe duan të kenë më shumë për vete duke mashtruar të tjerët. Bibla thotë, "Dashuria për paratë është rrënja e gjithë të keqes." A të duket vetja lakmues dhe egoist? Ja përse ti ke nevojë për Perëndinë që të të ndryshojë.

Qengja, dema dhe pëllumba ishin në shitje në tempull. Hebrenjtë i blinin këto kafshë për t'i bërë fli. Shumë herë çmimet e caktuara për këto kafshë ishin të padrejta. Gjithë këto shkaktonin shumë britma dhe grindje.

(Figura 2-3)

Kur Zoti Jezus arriti në mes të çrregullimit, Ai e kuptoi menjëherë çfarë duhet të bënte. Ai ishte i zemëruar për shkak të gjërave të këqija që po ndodhnin në shtëpinë e Perëndisë.

Ai bëri një kamxhik litari nga litarët e vegjël që ishin hedhur aty dhe e vërviti në ajër. "Largojini që këtej këto gjëra," urdhëroi Ai. "Mos përdorni shtëpinë e Atit tim si treg." Shumë tavolina u përmbysën. Monedhat u shpërndanë në dysHEME. Delet dhe demat dolën jashtë tempullit. Njerëzit i morën kafazet të mbushur me pëllumba dhe u larguan me shpejtësi. A e imagjinoni çfarë menduan njerëzit? "Në fund të fundit kush është ai? Ç'donte të thoshte ai me 'shtëpinë e Atit Tim'? A ka të drejtë ai të bëjë këtë?" Shumica e njerëzve nuk mund të kuptonte pse e bëri Ai këtë. Por ne e dimë apo jo? Pse mund të vepronte Jezusi ashtu? A nuk na ndihmon mësimi i javës së fundit për të kuptuar këtë gjë? Kjo është e drejtë. Jezus Krishti është i gjithëpushtetshmi Bir i Perëndisë. Ja pse Ai kishte autoritetin dhe pushtetin të vepronte ashtu. Ai kishte pushtet për të bërë mrekulli gjithashtu dhe Ai bëri mrekulli në Jeruzalem.

Kuptohet se Nikodemi kishte parë ose dëgjuar për gjithçka që ndodhi. Kjo e bëri atë më shumë kureshtar rreth Zotit Jezus. Ai po mendonte se si të takonte Zotin Jezus. Në qoftë se Farisenjtë e tjerë do ta shihnin atë me Jezusin kjo nuk do të ishte mirë. Atyre nuk u pëlqente të dëgjonin ato që Jezusi u mësonte, sepse Ai u tregonte sa mëkatar ishin, pavarësisht se bënë punët e tyre të mira. "Do të shkoj natën," mendoi ai.

(Figura 2-4)

Dhe kështu veproi. Ndërkohë që pothuaj gjithë njerëzit e tjerë flinin, Nikodemi erdhi aty ku Jezusi po rrinte. Ndoshta ata folën me njëri tjetrin nën qiellin e zi me yje. "Rabi (apo mësues)," tha Nikodemi, "Ne e dimë që ju jeni një mësues i ardhur nga Perëndia; sepse asnjeri nuk mund të bëjë mrekullitë që ju bëni, pa pasur Perëndinë me vete." A ishte Zoti Jezus një mësues? A erdhi Ai nga Perëndia? Por nuk ishte Ai më shumë se një mësues i dërguar nga Perëndia? Po, patjetër Ai ishte. Ai ishte Perëndia ... Perëndia Bir. Zoti Jezus foli me Nikodemin.

*(Vendos në tabelë pamjen (a) e Gjonit 3:3 dhe lexoni së bashku nga ajo.)
Le të shohim çfarë tha Ai (është shkruar në Bibël - Gjoni 3:3): "Në të vërtetë po të them që nëse një nuk ka rilindur, nuk mund ta shohë mbretërinë e Perëndisë."*

A nuk po thoshte Zoti Jezus diçka të çuditshme? A e di ti se pse e tha Ai këtë? Zoti Jezus e njihnte Nikodemin dhe Ai e dinte ç'kishte me të vërtetë në mendjen e Nikodemit. Nikodemi donte të ishte në mbretërinë e Perëndisë. Ai donte t'i përkiste Perëndisë dhe të jetonte me Perëndinë përgjithmonë. Të ishte fetar, të thoshte lutje, të shkante në tempull nuk e bënë atë t'i përkiste Perëndisë. Nikodemi i vërtetë ishte akoma mëkatar dhe nuk i pëlqente Perëndisë. Është e njëjta gjë me ju dhe mua: Nikodemi, ju dhe unë, të gjithë kemi lindur me zemër mëkatore. Që të jemi në familjen e Perëndisë, ne duhet të rilindim. Në qoftë se ju do të kishit qenë atje, çfarë pyetje tjetër do të kishit bërë? Po, Të njëjtën pyetje që bëri dhe Nikodemi.

(Vendos "Si?" pamje (b).)

Nikodemi ishte mjaft në dyshim. Jezusi i shpjegoi atij që kishte dy lloj lindjesh të ndryshme. Një lindje është kur një fëmijë lind - një qenie njerëzore fillon të jetojë jetën e tij në këtë botë. Çdo fëmijë lind si çdo qenie tjetër njerëzore me kocka dhe mish, me lëkurë e gjak - dhe me një natyrë mëkatore. Lindja tjetër është ajo për të cilën foli Jezusi, të lindësh në familjen e Perëndisë dhe të bëhesh një person i ri. Kjo s'do të thotë të kesh një trup të ri; por ajo që jeton në trup është ndërruar aq shumë sa që Bibla e quan këtë njeri një "krijesë e re". Ai që lind përsëri duket njëlloj nga jashtë, por mëkati i tij është larguar dhe Perëndia i ka dhënë atij një natyrë të re: ai ka pushtetin dhe dëshirën të jetojë për t'i pëlqyer Perëndisë. Vetëm Perëndia mund ta bëjë këtë. Jezusi i tha Nikodemit, që është Perëndia, Fryma e Shenjtë, që i bën njerëzit të rinj.

(Vendos (c) pamje "Me anë të Perëndisë, Frymës së Shenjtë.")

Ti ke dëgjuar se duhet të kthehesh nga mëkatet e tua dhe t'i besosh Zotit Jezus si Shpëtimtarit tënd, por

zemra jote mëkatore nuk do ta bëjë këtë. Ti s'ke fuqi vetë që ta bësh këtë.

Ti ke nevojë për Perëndinë Frymë e Shenjtë që të punojë në zemrën tënde, që të të tregojë ty mëkatet e tua. Vetëm atëherë mund të të vijë keq për mëkatet e tua dhe t'i besosh Zotit Jezus Krisht. Në qoftë se do të jesh në familjen e Perëndisë, Fryma e Shenjtë duhet të të bëjë një njeri të ri. Zoti Jezus i tha akoma edhe një herë Nikodemit, "Ti duhet të rilindësh."

(Vendos (d) pamje gjithashtu në tabelë.)

Nikodemi nuk ishte akoma i sigurt se për çfarë po fliste Jezusi. "Si mund të jenë kështu këto gjëra?" pyeti ai Birin e Perëndisë.

(Vendos (e) pamje "Si?" të dytë në tabelë.)

Pastaj Zoti Jezus i kujtoi atij diçka që kishte ndodhur tek fëmijët e Izraelit shumë kohë më parë. Nikodemi e dinte mirë historinë.

Qindra vjet më parë, njerëzit hebrenj ishin duke udhëtuar nga Egjipti në vendin që Perëndia u kishte premtuar t'u jepte. Ata rebeloheshin dhe ankoheshin dhe u zemëruan me udhëheqësin e tyre, Moisiun. Perëndia u zemërua sepse ata kishin mëkatuar në këtë mënyrë dhe dërgoi gjarpërinj helmues midis njerëzve. Shumë njerëz vdiqën nga kafshimet e gjarpërinjve dhe shumë të tjerë ishin duke vdekur. "Moisi," thirrën ata, "Ne kemi mëkatuar, sepse folëm kundër Zotit dhe kundër teje. Kërkoji Perëndisë të largojë gjarpërinjtë." Moisiu u lut për njerëzit. Perëndia e dëgjoi lutjen e tij dhe siguroi një mënyrë për ata që qenë kafshuar që të shëroheshin. Ai i tha Moisiut të bëjë një gjarpër prej bronzi dhe ta vërë atë lart në një shtyllë.

(Figura 2-5)

"Kushdo që shikon gjarpërin do të shërohet," tha Perëndia. Dhe ata u shëruan menjëherë. Dëgjoni fjalët e Zotit drejtuar Nikodemit. "Ashtu si Moisiu e ngriti lart gjarpërin në shkretëtirë, kështu duhet të ngrihet lart Biri i njeriut, që kushdo që beson në të të mos humbasë, por të ketë jetë të përjetshme."

(Vendos figurën (f) "Kështu duhet të ngrihet lart Biri i njeriut.")

Ç'do të thotë kjo? Zoti Jezus po shpjegonte se si është e mundur për njerëzit të rilindin. Ai erdhi të ndëshkohej për gjithë mëkatet tona dhe të vdesë në kryq, kështu djem dhe vajza, burra dhe gra mund të bëhen persona të rinj. Nëse Ai nuk do të vdiste në vendin tonë, askush nuk do të ishte në mbretërinë e Perëndisë. Çfarë çmim të madh pagoi Zoti Jezus që ne të mund të rilindim! Ndoshta ti dëshironi me gjithë zemër të jesh i sigurt që i përket Perëndisë. Si mund të sigurohesh se je i rilindur? Çfarë duhet të bënin njerëzit në shkretëtirë për t'u shëruar? Po, ata shikuan gjarpërin prej bronzi dhe ata menjëherë u bënë më mirë. Ata i besuan fjalës së Perëndisë, kur Ai tha që një vështrim mund t'i shërojë ata. Zoti Jezus u ngriti lart në kryq. Ai nuk është në kryq sot; Ai është në qiell dhe ti në qoftë se i besoni Atij, do të falesh. Është pak si "të shikosh Atë", siç panë hebrenjtë gjarpërin prej bronzi. Në qoftë se dëshiron të besosh tek Zoti Jezus, mund t'i thuash Atij diçka të tillë, "I dashur Zoti Jezus, unë dua t'i përkas Perëndisë. Faleminderit që vdiqe në kryq për mëkatin tim. Të lutem largo mëkatet dhe merr përsipër jetën time." Në qoftë se ti me të vërtetë "shikoni Atë", atëherë ti mund ta jesh i sigurt se ke rilindur nga Perëndia prej Frymës së Shenjtë.

Jezusi donte që Nikodemi të kuptonte me të vërtetë se e vetmja rrugë për te Perëndia ishte t'i besonte Atij. Ai i tha këto fjalë të bukura.

"Sepse Perëndia e deshi aq botën, sa dha Birin e tij të vetëmlindurin, që, kushdo që beson në të, të mos humbasë, por të ketë jetë të përjetshme." (Gjoni 3:16)

"Nikodemi, duhet të më besosh mua," tha Shpëtimtari.

(Vendos fjalën (g) "besoni".)

(RDK) Bibla nuk na thotë se ç'ndodhi pastaj. Ne nuk e dimë nëse Nikodemi shkoi në shtëpi atë natë të mendonte për ç'ka mësoi. Ndoshta ai i besoi Shpëtimtarit para se të largohej. S'është nevoja që të jesh në një vend të veçantë për të besuar Shpëtimtarin. Mund të ulësh kokën pikërisht tani dhe qetësisht kërkoji

Atij të të shpëtojë. Ti mund t'i besosh Atij në dhomën tënde të gjumit, kur të shkosh në shtëpi, sepse s'ke nevojë të jesh me një njeri tjetër. Ndonjëherë djem dhe vajza kanë pyetje rreth besimit tek Krishti dhe kanë dëshirë që t'i ndihmojë dikush. Në qoftë se ti je një nga ata, unë do të jem i lumtur të pres pas takimit dhe do të përpiqem t'u përgjigjem pyetjeve të tus. Të lutem eja dhe pyet po të kesh gjë të paqartë. Ti mund të vish dhe të ulesh në një nga karriget e rreshtit të parë.

Kështu unë do të kuptoj se ke pyetje për besimi tek Krishtit dhe dëshiron që të shpëtohesh sot.

(Figura 2-6)

Pyetjet e Nikodemit mbaruan. Ai u largua, por ne e dimë se Fryma e Shenjtë e bëri atë një njeri të ri. Asnjëri nuk e pa Frymën e Shenjtë ta bëjë atë njeri të ri, sepse asnjëri nuk mund të shohë Perëndinë Frymë e Shenjtë. Por njerëzit panë ndryshimet në jetën e Nikodemit. Një ditë, kur farisenj të tjerë donin të vrisnin Jezusin, Nikodemi u doli përpara për ta mbrojtur Atë. I duhej kurajë, por Perëndia ia dha atij këtë kurajë. Herën e fundit që ne dëgjojmë për Nikodemin në Bibël është ajo e mbrëmjes kur vdiq Jezusi. Të gjithë dishepujt e Jezusit u larguan, sepse ata u trembën nga farisenjtë dhe të tjerët që kryqëzuan Zotin. Por ishte Nikodemi që solli erëza me aromë për varrimin. Me shokun e tij, Jozefin, ai mbështolli trupin e Zotit Jezus me pëlhurë dhe e vendosi atë në varr.

A mund ta imagjinoni sa i gëzuar ishte Nikodemi pasi Jezusi u ringjall nga të vdekurit? Çdo njeri e kuptoi se Nikodemi kishte ndryshuar.

Kur ti rilind, jeta jote do të ndryshojë. Do të jesh më i bindur r dhe do të ndihmosh më shumë për punët në shtëpi. Do të kesh dëshirë të ndihmosh duke mbajtur dhomën tënde pastër dhe do të jesh i kënaqur kur nëna të dërgon në dyqan për të blerë. Njerëzit e tjerë do ta shohin se ti je një njeri i ri.

A ke rilindur? Unë nuk po të pyes nëse shkon në kishë ose lutesh apo nëse je i mirë dhe i sjellshëm. Nikodemi ishte i tillë, por ai kishte nevojë të rilindte. Zoti Jezus të thotë edhe ty, "Ti duhet të rilindësh." Beso te Jezusi sot; kërkoji Atij të të bëjë një njeri krejt të ri dhe të të marrë në familjen e Tij.

Pyetje përsëritje mbi mësimin 2

1. Ç'njerëz ishin farisenjtë?

(Ata ishin shumë fetarë, thoshin lutje të gjatë dhe dukeshin sikur donin Perëndinë.)

2. Si quhej fariseu që donte të fliste më Zotin Jezus?

(Nikodemi.)

3. Në ç'qytet erdhi natën Nikodemi të takonte Zotin Jezus?

(Jeruzalem.)

4. Çfarë gjeti në zonën e Tempullit Zoti Jezus që u zemërua aq shumë?

(Njerëz që këmbenin para, shisnin kafshë dhe vinin çmime të larta.)

5. Ç'bëri Zoti Jezus?

(Ai i përzuri të gjithë ata persona që merreshin me këto punë.)

6. Kur Nikodemi takoi Jezusin natën, kush mendoi ai se ishte Jezusi?

(Një mësues i ardhur nga Perëndia.)

7. Çfarë ishte e nevojshme të ndodhte në jetën e Nikodemit sipas Zotit Jezus?

(Ai duhej të rilindte.)

8. Ç'do të thotë të rilindësh?

(Të bëhesh një njeri i ri nëpërmjet Perëndisë Frymës së Shenjtë, që bën mrekulli brenda nesh.)

9. Çfarë historie përdori Zoti Jezus për të treguar që çdo njeri, për të shpëtuar i nevojitet t'i besojë Atij?
(Historinë e njerëzve të kafshuar nga gjarpërinj helmues që shikonin tek gjarpri prej bronzi për t'u shëruar.)
10. Si mundi të rilindë Nikodemi dhe si mund të rilindim edhe ne?
(Duke besuar vetëm te Jezus Krishti që u kryqëzua dhe u ringjall për ne.)

Mësimi 3

Një Grua në Samari

Shkrimi i Shenjtë:	Gjoni 4:3-34; 39-42
E vërteta qendrore:	Jeta e përjetshme është dhuratë nga Perëndia nëpërmjet Zotit Jezus Krisht
Zbatimi:	Të pashpëtuar: E vetmja rrugë që të keni jetën e përjetshme është që të vini tek Jezus Krishti. Të shpëtuar: Në qoftë se ju jeni i krishterë, ju mund të jeni të sigurt se keni jetën e përjetshme.
Pikat kryesore të mësimi:	
Fillimi:	Të lodhur, të etur dhe të uritur
Zhvillimi i ngjarjeve	Gruaja Samaritane vjen për ujë VQ1 Bashkëbisedim me Krishtin "A mund të më jepni për të pirë?" "Unë jam Samaritane." "Unë mund t'ju jap ujë të gjallë." VQ2 "Më jep nga ky ujë." "Shko, thirr burrin tënd." "Unë s'kam burrë." VQP3 "Ku duhet të adhurojmë?" "Adhuro në Frymë dhe në të vërtetën." VQ4 "Unë e di se Krishti do të vijë." "Unë jam Ai." VQS5 Dishepujt kthehen Gruaja largohet nga pusi "Ejani të shikoni një burrë." Kulmi: Jezusi u ftua të rrinte Përfundimi: Shumë veta besojnë VQP6
Vargu përmendësh:	<i>Vazhdo të mësosh Filipianëve 2:9 "Prandaj edhe Perëndia e lartësoi madhërisht dhe i dha një emër që është përmbi çdo emër."</i>

Shënim: Vihuni në dispozicionin të nxënësve.

Ky mësim flet se si Zoti Jezus ia shpjegoi rrugën e shpëtimit një gruaje nga Samaria. Para se të jepni mësimin, tregojini fëmijëve se ju jeni gati t'u shpjegoni rrugën e shpëtimit për secilin që do ndihmë. Thojini atyre ku dhe kur të vijnë te ju për ndihmë. S'është e mjaftueshme për ata të dinë se si zonja në mësimin e sotëm erdhi t'i besonte Krishtit. Ata kanë nevojë të vijnë t'i besojnë Atij gjithashtu; bëjuani atyre të ditur se ju mund t'u shpjegoni se si ata mund të bëjnë këtë - në mënyrë individuale me secilin që do të dijë për këtë gjë.

Pamje ndihmëse të tjera.

Ky mund të jetë një mësim i vështirë për t'u shpjeguar, sepse ka pak veprime dhe shumë bashkëbisedime dhe simbolizëm ("ujë jete", "etje shpirtërore", etj.). Për të ndihmuar mbajtjen e vëmendjes së fëmijëve, ju mund të tregoni një gotë me ujë gjatë parathënies dhe referohuni asaj kur krahasoni "etjen shpirtërore" dhe "ujë jete", si dhe "të marrësh dhuratën e Perëndisë". Përgatitni rripa letre të shkruara "Si mund të keni jetën e përjetshme?", "Shko në kishë", "Bëj një jetë të mirë", "Bëj mjaft lutje" dhe "Është dhuratë nga Perëndia" - për këtë pjesë të mësimi.

Mësimi

(Figura 3-1)

Oh, sa nxehtë ishte! Ata kishin ecur shumë së bashku dhe ishin të lodhur, të etur e të uritur. Ata kishin akoma shumë rrugë për të bërë.

Zoti Jezus dhe dishepujt e Tij ishin duke ecur në rrugën tërë pluhur që lidhte Judean me Galilenë. Galilea ishte zona ku Jezusi u rrit.

(Mësues, ti mund të tregosh edhe hartën e Palestinës.)

Rruga më e shkurtër për në Galile kalonte përmes Samarisë. Grupi i 13 burrave sapo kishte kaluar kufirin me Samarinë dhe po i afroreshin një qyteti të quajtur Sihar.

Ky mund të ishte një vend i mirë për të ndaluar pak, sepse Zoti Jezus ishte i lodhur. Megjithëse Ai ishte Biri i Perëndisë, Ai ishte edhe njeri, dhe si njerëzit e tjerë, Ai lodhej dhe kishte nevojë për pushim dhe ushqim. A nuk ju pëlqen një gotë uji kur keni etje, ose diçka për të ngrënë kur keni uri? Dishepujt dolën nëpër qytet të gjejnë diçka për të ngrënë.

(Figura 3-2)

Rreth të njëjtës kohe një grua po largohej nga qyteti, me një poçe uji në dorë. Ajo po shkonte te pusi të mernte ujë për të pirë. Ishte një orë e pazakonshme e ditës për një grua të shkonte te pusi. Ndoshta ajo nuk donte të vinte atje në të njëjtën kohë kur vinin dhe gratë e tjera. Ajo bënte një jetë me të vërtetë mëkatore dhe ndoshta kishte pak shoqe të vërteta. Me sa dukej ajo kënaqej me jetën e saj mëkatore, por ajo nuk e dinte se mund të kishte një jetë tjetër - jetën e përjetshme. Ajo ishte "e vdekur në mëkat" - siç thotë edhe Bibla për ata njerëz që ishin pa Krishtin (Efesianëve 2:5).

Bibla thotë që mëkati na bën neve të gjithëve të vdekur ndaj Perëndisë. Kjo do të thotë se ne jemi shkëputur nga Perëndia, të ndarë prej Atij, sepse Ai është i shenjtë dhe ne jemi mëkatarë. Ne kemi nevojë për jetën e përjetshme nga Perëndia. Pa atë ne jemi të ndarë nga Ai përgjithmonë. Kjo grua me të gjithë jetën e saj mëkatore, s'kishte dëgjuar kurrë se ajo mund të kishte jetën e përjetshme. Ajo nxitoi te pusi.

(Figura 3-3)

Sa e habitur qe ajo kur arriti atë! Ajo nuk do të ishte vetëm. Ishte një burrë atje. Ajo do të mernte ujë dhe s'do t'i kushtonte rëndësi Atij, mendoi ajo. Ndoshta ajo u përpoq të shikonte nga ana tjetër pasi uli poçen e ujit në pus.

Në këtë moment i huaji i foli asaj.

"A mund të më japësh për të pirë pak ujë, të lutem?" tha Jezusi.

Ai s'ishte vetëm i etur, por përdorte një rrugë të përshtatshme për t'u miqësuar.

Gruaja u kthye dhe e pa Atë. Ai ishte një hebre! Një hebre t'i fliste asaj, një gruaje Samaritane! Hebrejtë u flisnin rrallë në një mënyrë kaq miqësore Samaritanëve. Ajo e pyeti Atë, "Si është e mundur që ti, duke qenë një hebre, më kërkon mua ujë? Unë jam Samaritane."

"Në qoftë se ti e di dhuratën e Perëndisë," u përgjigj Ai, "dhe të më kishe njohur kush jam unë, ti do të më kërkoje mua për të pirë dhe unë do të të jepja ty ujë të gjallë."

Gruaja u përgjigj, "Zotëri, ti s'ke asnjë mjet për ta nxjerrë ujin që është thellë në pus."

(Thuhet se pusi ishte rreth 30 metra i thellë.)

"Si mund të marrësh ti këtë ujë të gjallë? A mos mendon se je më i madh se Jakobi që na dha neve këtë pus të famshëm?" Ajo nuk e dinte kush ishte Jezusi dhe ajo s'mund ta kuptonte për çfarë po fliste Ai. Ç'ishte ky "ujë i gjallë"?

Jezusi po i fliste asaj rreth jetës së përjetshme. Uji është i rëndësishëm për ne që të jetojmë në këtë botë, por uji i jetës ose jeta e përjetshme është ajo që na duhet për të jetuar me Perëndinë. Kur dikush ka jetë të përjetshme, ai s'është më i vdekur ndaj Perëndisë. Ai e njeh Perëndinë dhe e do Perëndinë dhe do

të shkojë një ditë të jetojë me Perëndinë përgjithmonë.

Por si mund të kesh ti jetë të përjetshme?

A janë këto rrugë të drejta?

- Ti mund ta kesh atë në qoftë se familja jote është e krishterë dhe ti shko në kishë.
- Ti mund ta kesh atë si Shpërblim në qoftë se jeton një jetë të mirë.
- Ti mund ta kesh atë në qoftë se thua mjaft lutje çdo ditë.

A mendon se këto janë të drejta?

Jo, asnjëra s'është e drejtë.

Ja si mund të kesh jetën e përjetshme:

- Ajo është dhuratë nga Perëndia.

Një dhuratë është diçka e dhënë nga dikush dhe duhet të merret, sikur të ishte jotja. Zoti Jezus Krisht, Biri i Perëndisë, është i vetmi që mund të japë jetën e përjetshme. Jeta e përjetshme është jeta e Perëndisë brenda nesh, kështu që ne mund të fillojmë të jetojmë për Perëndinë. Zoti Jezus ia ofron atë mëkatarëve. Ai donte që kjo grua mëkatore ta kuptonte se Ai është i vetmi që mund t'i jepte asaj ujë të gjallë. Ai i tha asaj, "Çdo njeri që pi ujë nga ky pus, do të ketë etje përsëri." Ajo e kuptoi këtë. Ajo e dinte se duhej ujë çdo ditë. Jezusi vazhdoi, "Çdo njeri që pi ujin e gjallë që Unë do t'i jap s'do të ketë etje kurrë. Do të jetë si një burim uji brenda tij, që gufon në jetë të përjetshme."

"Më jep mua këtë ujë," tha ajo, "që të mos kem më etje kurrë. Unë s'do të kem nevojë të vijë përsëri këtu për ujë."

Ajo përsëri nuk e kuptoi, por Zoti s'kishte mbaruar së shpjeguari asaj. Ai i tha një gjë të çuditshme asaj: "Shko dhe thirrë burrin tënd, dhe ejani përsëri këtu."

Këto fjalë e tronditën atë.

Ajo tha, "Unë s'kam burrë."

"Unë e di," tha Zoti Jezus. "Ti ke pasur pesë burra dhe ti s'je e martuar me burrin me të cilin po jeton tani."

Jezusi dinte çdo gjë rreth saj. Si? Ai e dinte, sepse Ai është Perëndia; Ai dinte rreth jetës së saj mëkatore. Ajo ishte e vdekur në mëkate dhe e ndarë nga Perëndia; ajo kishte thyer ligjet e Perëndisë, si çdonjëri nga neve. Bibla thotë se s'ka njeri që nuk mëkaton (Romakëve 3:12). Kjo shfaqet në jetën tënde.

Ti je më shumë i interesuar në lodrat e tua, në programet në televizor dhe lojëra të tjera se sa të dëgjosh rreth Perëndisë. Por ligji i Perëndisë thotë, "Ju s'do të keni asnjë Perëndi tjetër para meje." Asgjë tjetër nuk duhet të jetë më e rëndësishme në jetën tënde sesa Perëndia. A je zemëruar ndonjëherë me vëllanë tënd e thua, "Unë e urrej atë"?

Zoti Jezus thotë se të urresh dikë është të shkelësh urdhëresën e cila thotë, "Ti s'duhet të vrasësh."

Jeta jote është mëkatore. Ndoshta ti mendon se ka mëkatarë më të këqij se ty. Por madje edhe një mëkat të ndan ty nga Perëndia. Po të vazhdosh me mëkate, s'do të kesh kurrë jetën e përjetshme; ti s'do të njohësh kurrë Perëndinë, apo të jetosh me Të përgjithmonë. Sidoqoftë, në qoftë se dëshiron të kthehesh nga rruga e gabimeve të jetës tënde dhe të besosh te Jezus Krishti, ti do të marrësh dhuratën e Perëndisë, jetën e përjetshme, falas, të njëjtën dhuratë që Jezusi i ofroi gruas Samaritane.

Nga ky moment ajo qe mjaft në dilemë. Si ishte e mundur që ky njeri dinte kaq shumë për atë? Si i dinte Ai mëkatet e saj? Ajo mendoi se Ai mund të ishte ndonjë profet i dërguar nga Perëndia. Ajo filloi të fliste rreth adhurimit të Zotin.

"Ne adhurojmë në këtë mal," tha ajo duke treguar me dorë malin aty afër.

"Por ju hebrenjtë thoni se njerëzit duhet të adhurojnë në Jerusalem."

Zoti Jezus i foli me shumë mirësi asaj. "Gjëja e rëndësishme rreth adhurimit për Perëndinë nuk është ku ne e adhurojmë Atë, por si e adhurojmë Atë. Ne duhet ta adhurojmë në frymë dhe në të vërtetën." Zoti donte që gruaja të kuptonte se vetëm ata, zemrat dhe jeta e të cilëve janë të drejta me Perëndinë, mund ta adhurojnë Atë.

Ata që kanë marrë dhuratën e Tij të madhe të jetës së përjetshme mund të vijnë tek Ai dhe të flasin me Atë, sepse mëkatet e tyre nuk i ndajnë më ata nga Ai. Ata e njohin dhe e duan Atë. Ja ç'do të thotë të adhuron "me frymë dhe në të vërtetën".

Ju s'mund të hiqeni si të jeni të drejtë me Perëndinë, edhe sikur çdo njeri t'ju shohë në kishë dhe të mendojë se ju po e adhuron Atë. Shumë njerëz në shumë kisha duken sikur e adhurojnë Perëndinë, por në qoftë se ata nuk kanë marrë kurrë dhuratën e Perëndisë, jetën e përjetshme, ai nuk është adhurim i

vërtetë. Kjo grua nuk e njihete Perëndinë e vërtetë - ajo nuk e adhuronte Atë.

Ajo tha, "Unë e di që Perëndia ka premtuar të dërgojë Një, të quajtur Krisht. Kur të vijë Ai, Ai do të na tregojë çdo gjë."

"Unë jam Ai," tha Zoti Jezus Krisht.

"Ai që ti po flet është Ai që Perëndia dërgoi." Zoti Jezus është "i Veçantë," i quajtur shpesh Mesia ose Krishti, të cilën Perëndia e kishte premtuar prej shekujsh. Ai, Biri i Perëndisë, erdhi të jepte jetën e përjetshme. Ai erdhi për të vdekur. Ai erdhi të paguante për mëkatet, që kush beson se vetëm Ai mund të largojë mëkatet, mund të ketë jetën e përjetshme. Ai s'është i vdekur sot, pasi në qoftë se Ai do të ishte, s'do të kishte jetë të përjetshme. Ai është gjallë dhe do të jetojë përgjithmonë. Çdo njeri që beson tek Ai mund të jetë i sigurt se kur ata do të vdesin, ata do të jetojnë përgjithmonë me Atë.

Bibla thotë, "Ai që ka Birin ka jetën" (1 Gjon 5:12). Ky është premtimi i Perëndisë për ty që je shpëtuar. Djalli do të përpiqet të të fusë dyshimin. Shpesh ai mund të të thotë, "Ti s'je i krishterë i mirë. Shih çfarë bërë. Ndoshta ti nuk je shpëtuar fare."

Kujto ç'ka thënë Perëndia, "Ai që ka Birin ka jetën." Në qoftë se ti e di që Zoti Jezus është Shpëtimtari yt, ti je i sigurt se ke jetën e përjetshme tani e përgjithmonë.

Po të besosh tek Krishti, duhet të falenderosh Zotin që të jep jetën e përjetshme. Ndoshta ky ishte momenti në të cilin gruaja besoi Zotin Jezus, se do t'i jepte jetën e përjetshme. Ai mund ta shpëtonte atë nga mëkati i saj dhe t'i jepte asaj jetën e përjetshme. Ajo s'do të ishte e njëjta përsëri.

(Figura 3-5)

Në të njëjtën kohë dishepujt e Zotit u kthyen. Ata ishin të çuditur që Ai fliste me këtë grua, por të gjithë kishin frikë të pyesnin pse Ai po fliste me të.

(Figura 3-4,5)

Gruaja u kthye dhe vrapoi drejt qytetit. Pse u largua ajo kështu papritur? Madje ajo la aty dhe poçen e ujit. Pse? A mos do të kthehej përsëri tek pusi? Dishepujt nuk e dinin, por gruaja e dinte saktësisht çfarë ajo po bënte. Ajo vrapoi për në qytet dhe u tregoi burrave që ajo gjeti atje. "Ejani dhe shihni një burrë që është në gjendje të tregojë çdo gjë që unë kam bërë në jetën time. A mund të jetë Mesia që premtoi Perëndia të dërgojë?"

Burrat u bënë kureshtarë dhe e shoqëruan atë menjëherë jashtë qytetit për tek pusi.

(Figura 3-6)

Ata mezi prisnin të takonin Burrin për të cilin po flitej. Ata e ftuan Zotin Jezus Krisht të vinte tek qyteti i tyre. Ai ishte i kënaqur të pranonte ftesën e tyre, kështu që Ai dhe dishepujt e Tij kaluan dy ditë atje - dy ditë ku Ai u foli shumë vetave në qytet për nevojën e tyre për jetën e përjetshme.

Meqë gruaja tregoi për Jezusin shumë njerëz filluan t'i besojnë Atij. Ata dëgjuan rreth Tij, ata e takuan Atë, e dëgjuan dhe i besuan Atij. Ata morën jetën e përjetshme. S'është e mjaftueshme të dish rreth Jezusit dhe të dish që Ai mund të japë jetën e përjetshme. Nuk është e mjaftueshme të dish që ti ke nevojë për jetën e përjetshme. Mëkatarët duhet të vijnë tek Zoti Jezus dhe t'i kërkojnë Atij që të falë mëkatet e tyre dhe t'u japë atyre këtë dhuratë të madhe.

A e ke besuar ndonjëherë Jezus Krishtin? Kujto Fjalët e Perëndisë që thotë se kush i beson Atij "nuk do të vdesë (s'do të ndahet nga Perëndia), por do të ketë jetën e përjetshme" (Gjon 3:16). Por në qoftë se nuk i ke besuar kurrë Atij, mos vazhdo të jesh i vdekur në mëkat. Thuaji Zotit se ti dëshiron që të çlirohesh nga mëkatet e tua dhe se ti do dhuratën e Tij falas për jetën e përjetshme. Thuaji Atij sot; besoji Atij si Shpëtimtarin tënd dhe, si ata njerëz në Samari, ti do të kesh jetën e përjetshme.

Pyetje për rishikimin e mësimit 3

1. Ku ndaloi Jezusi dhe dishepujt e Tij për të pushuar dhe për të ngrënë ushqim gjatë rrugës nga Judea për në Galile?

(Afër Siharit, në Samari.)

2. Pse u ul Zoti Jezus te pusi? (Sepse Ai ishte i lodhur.)
3. Kush erdhi rreth mesditës të merrte ujë për të pirë? (Një grua nga Samaria.)
4. Pse u habit gruaja kur Zoti Jezus i kërkoi asaj pak ujë për të pirë?
(Ajo nuk priste nga Ai që t'i fliste asaj, sepse Ai ishte hebre; hebrenjtë nuk i donin aspak njerëzit e Samarisë.)
5. Çfarë i tha Zoti Jezus se do t'i jepte kësaj zonje, po qe se ajo i kërkonte?
(Ujë jetë, jetë të përjetshme.)
6. Pse e pyeti Zoti Jezus atë për burrin e saj?
(Që ajo të shihte mëkatet e saj dhe nevojën e saj për t'u falur dhe ndryshuar.)
7. Çfarë tha Zoti Jezus kur e pyetën se kush ishte? (Krishti, Shpëtimtari i premtuar.)
8. Pse u largua gruaja me vrap për në qytet duke mos marrë me vete as enën e ujit?
(Ajo donte t'u tregonte të tjerëve rreth Zotit Jezus: "A mund të jetë Ai Mesia i premtuar?")
9. Çfarë ndodhi kur Zoti Jezus qëndroi dy ditë në Sihar për t'u folur njerëzve? (Shumë të tjerë besuan tek Ai si Shpëtimtari i tyre.)
10. Çfarë duhet të bësh ti që të kesh jetën e përjetshme?
(Unë s'do të bëj asgjë vetë për të pasur jetën e përjetshme; unë thjesht fare besoj tek Zoti Jezus Krisht ta bëjë këtë për mua.)

Mësimi 4

Zoti Shëron Një Djalë, Por Nuk Pranohet Në Qytetin E Lindjes.

Shkrimi i Shenjtë:	Gjoni 4:45-54; Lluca 4:16-32
E vërteta qendrore:	Pa besim, është e pamundur t'i pëlqesh Zotit.
Zbatimi:	Të pashpëtuar: Ti duhet të besosh vetëm Krishtin për të shpëtuar. Të shpëtuar: Ti duhet të vazhdosh të besosh Krishtin dhe Fjalën e Tij çdo ditë.
Pikat kryesore të mësimi:	
Fillimi:	"Të gjithë në shtëpi ishin të mërzitur."
Zhvillimi i ngjarjeve:	Djali është shumë i sëmurë Prindërit dëgjojnë se Zoti është në Kanë Babai shkon në Kanë VQ1 Babai i kërkon Zotit të vijë VQP2 "Eja para se të vdesë djali im." VQP3 "Djali yt jeton." Familja beson VQS4 Zoti Jezus shkon në sinagogë Njerëzit nuk besojnë VQP5 Njerëzit përpiqen të vrasin Jezusin VQP6 Jezusi largohet nga Nazareti VQP7
Kulmi:	
Përfundimi:	
Vargu përmendësh:	<i>Filipianët 2:10 "Që në emër të Jezusit të përkulet çdo gju i krijesave (ose gjërave) qiellore, tokësore dhe nëntokësore."</i>

Vënia në Dispozicion të Nxënësve

Kur ju u mësoni fëmijëve këtë varg, ju keni mundësi të bisedoni me një fëmijë që ka dëshirë "të bjerë në gjunjë" para Zotit Jezus Krisht dhe ta pranojë Atë si Shpëtimtar dhe Zot.

Mësim

Me sa duket shtëpia ishte më e mira në gjithë qytetin e Kapernaumit. Burri që e kishte këtë shtëpi kishte një punë shumë të rëndësishme, sepse ai ishte një oficer i mbretit; ai quhej fisnik. Por të gjithë në shtëpi ishin të mërzitur.

Djali i fisnikut ishte sëmurë. Ai kishte shumë temperaturë dhe ishte aq i sëmurë sa gati po vdiste. Ata s'kishin kurë për atë; doktorët s'bënin dot gjë. A e përfytyroni dot se si ndihej kjo familje? Të gjitha shpresat dukej se kishin humbur. Ndoshta në këtë moment një shërbëtor hyri me vrap në dhomë.

"Jezusi është në Kana."

"Jezus? Ah, po! Ai që ktheu ujin në verë."

(Figura 4-1)

Pa dyshim lajmi i mrekullisë që bëri Jezusi kishte arritur në Kapernaum, sepse ishte vetëm rreth 30 km nga Kana.

Ata morën vesh rreth Zotit Jezus dhe e dinin se Ai kishte fuqi të bëjë mrekulli. "A do të vijë Jezusi dhe të shërojë djalin tonë?" pyesnin ata.

"Unë do të shkoj e do ta pyes Atë," tha fisniku.

Udhëtimi në Kanë nuk i ishte dukur kurrë kaq i gjatë. Çdo minutë kishte rëndësi sepse djali i vogël shkonte drejt vdekjes. Fisniku duke ecur me vrap duhet të kishte menduar për Jezusin. Ai ishte tepër i kënaqur që e kishte dëgjuar për Atë. Sikur të mos i kishte thënë asnjëri gjë, ç'shpresë do të kishte pasur ai tani? Është shumë e rëndësishme të dëgjosh rreth Zotit Jezus Krisht. Asnjëri s'mund të ketë besim tek Ai apo t'i besojë Atij, në qoftë se s' ka dëgjuar për Të. Në Bashkësi ju keni dëgjuar për Atë. Ju e dini kush është Ai dhe ç'ka bërë. A mund të më tregoni disa nga gjërat që keni dëgjuar?

(Jepu mundësinë nxënësve të marrin pjesë.)

Ne e dimë se të gjitha këto gjëra janë të vërteta sepse ne lexojmë për ato në Bibël. Ne e dimë se Zoti Jezus mund të bëjë gjithçka. Ne e dimë se Ai gjithmonë i mban premtimet. Ne e dimë se Ai mund të na falë mëkatet dhe të na japë jetën e përjetshme. Është e rëndësishme shumë të dimë rreth Zotit Jezus, por ka diçka më shumë të rëndësishme. Është e rëndësishme ta besosh Atë si Shpëtimtarin tënd. Ne mund të njohim çdo gjë rreth Atij, por po nuk e besuam Atë, ne s'do ta kënaqim Perëndinë.

Perëndia thotë në Fjalën e Tij, "Pa besim është e pamundur t'i pëlqesh Perëndisë" (Hebrenjve 11:6). Sa e rëndësishme është të të pëlqejë Perëndia, ta nderosh Atë që është Mbret mbi mbretër dhe Zot mbi zotër - Krijuesi ynë dhe i vetmi Shpëtimtar! Hapi i parë për ta kënaqur Zotin është të vësh besimin tënd tek Ai dhe ta pranosh Atë si Zotin dhe Shpëtimtarin tënd personal. A nuk je i kënaqur që ke dëgjuar rreth Jezusit, siç qe edhe fisniku? Më në fund ai arriti në qytetin e Kanës dhe menjëherë filloi të kërkojë Zotin Jezus.

(Figura 4-2)

Sapo ai e gjeti Zotin, babai i djalit filloi t'i kërkojë dhe t'i lutej Zotit Jezus, "Të lutem, eja në shtëpinë time tani menjëherë dhe shëro djalin tim, sepse ai po vdes."

Babai e dinte thellë në shpirt se Zoti Jezus mund ta shëronte djalin e tij. A je i sigurt në zemër që Zoti mund të të falë të gjitha mëkatet? A beson me të vërtetë se Ai mund të të japë ty jetën e përjetshme? Është e rëndësishme të dish rreth Tij, siç bëri fisniku; është e rëndësishme të jesh i sigurt që Ai mund të të falë; por të dish të gjitha këto nuk është e mjaftueshme që ta kënaqësh Perëndinë. Ti duhet t'i besosh Atij të të largojë gjithë mëkatet e tua. Në qoftë se do të ishe i sëmurë dhe do të jepnin një shishe me ilaç, çfarë do të të duhej të bëje? A do të të bënte mirë po të rrinte në tavolinë pranë shtratit tënd?

A do të vliente në qoftë se doktori do të thoshte se është ilaçi më i mirë në botë? Patjetër jo. Ti ke nevojë ta pish atë. S'ka rëndësi sa di ti rreth Jezus Krishtit, ose sa beson se Ai mund të bëjë, kjo s'ndryshon gjë në jetën tënde, derisa ti ta besosh Atë për të të larguar mëkatet. Ja ç'është besimi.

"Zotëri, të lutem eja para se fëmija im të vdesë," tha burri. "Shko në shtëpi i qetë dhe mos u mërzit. Djali yt do të jetojë," tha Zoti Jezus. Ai nuk tha se do të shkonte me babanë të shihte djalin, dhe babai nuk e kërkoi përsëri. Pse?

(Lejo fëmijët të përgjigjen.)

Po, babai besoi fjalën e Zotit Jezus.

Ai kishte besim te Zoti dhe u kthye për në shtëpi. Besimi është t'i besosh Jezusit për të bërë atë që Ai thotë se do ta bëjë. Ai premtonte të japë jetën e përjetshme të gjithëve që e besojnë Atë.

"Ai që beson në Të, nuk do të vdesë, por do të ketë jetë të përjetshme" (Gjoni 3:16).

Ti mund t'i besosh Atij sot dhe do të kesh jetën e përjetshme. Ti mund t'i thuash diçka si kjo: "I dashur Zoti Jezus, unë e di se Ti je i vetmi që mund të më japësh jetën e përjetshme. Unë besoj se Ti vdiqe në kryq për mëkatet e mia. Të lutem më largo mëkatet dhe më jep jetën e përjetshme. Të lutem kujdesu për mua dhe ji Zoti im dhe Shpëtimtari im."

Vetëm kur ti me të vërtetë i besoni Atij që të të vërë në rrugën e Zotit, vetëm atëherë jeta jote do t'i pëlqejë Perëndisë. A do t'i besosh Atij sot siç bëri fisniku?

(Figura 4-3)

Ai u largua nga Zoti Jezus dhe për disa arsye nuk shkoi drejt për në shtëpi atë ditë. Ishte pasdite herët dhe Kapernaumi ishte rreth 30 km larg. Ndoshta ai ishte aq i lodhur sa ai s'mund të udhëtonte për në shtëpi -

të paktën para se të binte nata. Ndoshta ai kishte një besim të tillë tek Zoti Jezus sa ai e dinte që djali i tij ishte mirë dhe kështu fjeti aty, me një qetësi të vërtetë në zemër.

Ditën tjetër, kur ai po ecte drejt qytetit të tij, ai njohu disa burra që po vinin drejt tij; ata ishin shërbëtorët e tij. Kur ata erdhën më afër, ai pa buzëqeshjet e tyre dhe dëgjoi t'i thoshin, "Djali yt shpëtoi dhe është mirë."

Çfarë kishte thënë Jezusi ishte absolutisht e vërtetë.

"Kur filloi të ishte më mirë?" pyeti babai. "Dje pasdite në orën një temperatura i ra," u përgjigjën shërbëtorët. Sa u kënaq burri kur ai kuptoi se kjo ishte koha ekzakt kur ai kishte biseduar me Jezusin.

Ai vrapoi për në shtëpi dhe ishte i kënaqur të takonte djalin e tij dhe gruan e tij.

A e imagjinoni ç'shtëpi e lumtur ishte ajo? Por ajo u bë edhe më e lumtur kur babai u tregoi atyre gjithçka rreth Zotit Jezus. Atë ditë gjithkush në shtëpi i besoi Zotit Jezus.

Mbase ti i ke besuar Zotit Jezus që të të bëjë të drejtë në sytë e Perëndisë; ti je i krishterë; ti e di që Ai t'i ka falur mëkatet dhe që të ka dhënë ty jetën e përjetshme. Por ky nuk është fundi i të besuarit. Perëndia do që ti të vazhdosh të besosh çdo ditë. Besoje Atë kur Ai thotë në Bibël, "Ja, Unë jam me ju gjithmonë" (Mateu 28:20).

Besoje Atë që të jetë me ty në shkollë, në shtëpi, kur je vetëm, madje edhe kur je në gjumë. Çdo herë që ti lexon një premtim në Bibël, ti duhet të jesh i sigurt se ai është i vërtetë. Kërkoji Zotit të bëjë për ty çfarë Ai premtonte. Kjo do të thotë të kesh besim dhe ta besosh Atë, ashtu si bëri familja e fisnikut.

Por jo çdokush në Galile i besoi Atij. Pranë Kanës ndodhej qyteti i Nazaretit ku Jezusi u rrit.

(Figura 4-4)

Në ditën e adhurimit, të quajtur dita e Shabatit, Jezusi shkoi në vendin e adhurimit, të quajtur sinagoga. Ngjante pak me ne kur shkojmë në kishë. Meqë udhëheqësit e sinagogës dinin se Ai ishte një mësues, ata i kërkuan të merrte pjesë në shërbim. Ai kishte predikuar në shumë sinagoga të tjera në Galile dhe gjithkush fliste për madhësitinë e Tij. Ata i dhanë Atij një pergamenë që ta lexonte.

(Mësues, shpjegjo dhe po qe e mundur, trego një figurë pergamene.)

Ajo ishte pjesa e Biblës sonë e quajtur libri i Isaias. Zoti Jezus e hapi pergamenën tek ajo që ne e quajmë Isaia 61 dhe filloi të lexojë tek vargu 1.

(Mësues, lexo Isaia 61:1,2a.)

(Figura 4-5)

Ai e dorëzoi pergamenën dhe u ul.

(Ishte zakon në sinagogë të qëndroje në këmbë për të lexuar dhe të uleshe për të folur.)

Turma në sinagogë priste të dëgjonte ato që Ai kishte për të thënë.

"Sot ky Shkrim i Shenjtë që Unë sapo lexova po bëhet i vërtetë, pikërisht këtu dhe tani," tha Ai. Ai donte të thoshte se Ai ishte personi rreth të cilit kishte shkruar Isaia, pothuajse 700 vjet para asaj dite. Ai kishte lexuar në Shkrimet e Shenjta për veten e Tij. Ndërkohë që Ai vazhdonte të fliste, njerëzit po çuditeshin me fjalët e Tij.

"A nuk është ky biri i Jozefit?" pyetën ata. Ata habiteshin se si kishte mundësi që biri i Jozefit mund të fliste për gjëra të tilla.

Për ta, Jezusi ishte thjesht biri i marangozit nga Nazareti. Ata nuk e besonin që Ai ishte Biri i Perëndisë së Gjallë. Ata besonin në lutjet, në vajtjet në Tempull, në veprimet e mira që bënin dhe në mbajtjen e rregullave. Ata nuk mund ta besonin që Jezusi ishte i vetmi Shpëtimtar. A ishin ata të mençur? Po, ata ishin, por kështu janë shumë djem dhe vajza - mbase dhe disa nga ju. Ti ke dëgjuar shumë herë për Zotin Jezus. Ti ke dëgjuar nga Bibla se ti duhet t'i besosh Atij që të të bëjë të drejtë me Perëndinë, por a e ke besuar ndonjëherë Atë? Në qoftë se jo, ti kurrë nuk mund ta kënaqësh Perëndinë, s'ka rëndësi sa përpiqesh të bëhesh i mirë apo sa shpesh shkon në kishë apo në bashkësi për fëmijët. Ti duhet t'i besosh Atij si Shpëtimtarin tënd. Unë gjithmonë mendoj se është tepër e trishtueshme kur njerëzit dinë kaq shumë për Jezusin dhe ata prapë nuk e besojnë Atë. Njerëzit në Nazaret e njihnin Atë kaq mirë. Disa kishin banuar në të njëjtën rrugë me Të; disa duhet të kenë luajtur me Të kur Ai ishte djalë i vogël, por pothuajse çdokush refuzoi ta besonte Atë si Shpëtimtarin e tyre.

(Figura 4-6)

Në fakt ata u inatosën me fjalët e Tij Ai u kishte treguar atyre që Perëndia i shpëtonte njerëzit të cilët nuk ishin hebrej. Ata ishin shumë krenar për kombësinë e tyre. Mendonin se Perëndia nuk donte asnjëri përveç hebrejve. Të inatosur u ngritën dhe e shtynë Jezusin jashtë sinagogës, në rrugë.

U grumbulluan dhe e nxorën Atë jashtë qytetit në buzën e një shkëmbi. Bibla thotë se ata e bënë me plan ta hidhnin që andej. Donin që Ai të vdiste. Kjo do të ishte e lehtë, sepse shumë veta po e shtynin. Por kur shkuan tek skaji i shkëmbit, diçka e çuditshme ndodhi. Pa përfillur shtytjet e tyre, Ai eci përmes turmës, larg nga skaji i shkëmbit, drejt vendi pa rrezik. Ishte një mrekulli. Ai u largua prej tyre sikur atyre nuk u kishte mbetur më shumë fuqi se një mizë, dhe u drejtua për në Kapernaum. Nuk kishte ardhur koha për Zotin Jezus të vdiste. Kur gjithçka të kryhej, Ai do të kryqëzohej për mëkatën tonë dhe do të ringjallej për ne. Ç' Shpëtimtari i mrekullueshëm është Ai! Ai i la pas në Nazaret ata që nuk e besonin. A je ti si ata njerëz? Ti kurrë nuk ke tentuar ta vrasësh Jezusin, por Bibla e thotë përderisa ti nuk e do Krishtin në jetën tënde, ti je po aq fajtor dhe mëkatar sa njerëzit në Nazaret. Ti nuk e kënaq Perëndinë sepse ti je akoma mëkatar. A nuk do ta besosh ti sot Atë, ashtu si bëri fisniku në Kapernaum? A nuk do t'i kërkosh Atij të jetë Zoti yt dhe Shpëtimtari yt sepse "pa besim është e pamundur t'i pëlqesh Perëndisë" (Hebrejve 11:6).

Pyetje për të rishikuar mësimin 4

1. Në ç'qytet duhet të shkonte fisniku për të gjetur Zotin Jezus? (Kana.)
2. Pse burri donte të takonte Zotin Jezus? (Djali i tij i vogël ishte i sëmurë.)
3. Çfarë i tha Zoti Jezus burrit?
("Shko në shtëpi. Biri yt do të jetojë.")
4. Çfarë bëri burri kur dëgjoi këto fjalë?
(Ai i besoi fjalët e Zotit Jezus.)
5. Çfarë lajmesh sollën shërbëtorët për fisnikun gjatë kohës që ai udhëtonte për në shtëpi?
(I thanë që djali i tij qe shëruar pikërisht në kohën kur Zoti Jezus kishte folur me të.)
6. Çfarë ndodhi kur babai erdhi në shtëpi? (Çdonjëri i besoi Zotit Jezus Krisht.)
7. Çfarë bënë njerëzit e Nazaretit, kur ata dëgjuan Jezusin të fliste në sinagogën e tyre?
(Ata refuzuan t'i besonin.)
8. Ku i drejtoi mosbesimi i tyre?
(Ata u përpoqën ta hidhnin nga shkëmbi.)
9. Pse njerëzit nuk ishin në gjendje ta hidhnin poshtë Zotin Jezus?
(Pushteti i Tij ishte më madhështor se çdonjëri prej tyre dhe Ai eci mes turmës drejt një vendi të sigurt.)
10. Çfarë është absolutisht e nevojshme, në qoftë se ne duam të fillojmë të jetojmë për të kënaqur Zotin?
(Ne duhet të besojmë në Zotin Jezus Krisht.)

Mësimi 5

Bartimeu i Verbër Rimerr Dritën e Syve

(një mësim i veçantë për ungjillizim)

Shkrimet i Shenjtë:

Marku 10:46-52; Lluka 18:35-43

**Theksim:
i veçantë (TV):**

Zoti Jezus është i Vetmi që mund të të largojë errësirën e mëkatit.

Zbatimi:

Të pashpëtuar: Besoji Atij që ta bëjë këtë për ty.

Pikat kryesore të mësimi:

Fillimi:

Zhvillimi i ngjarjeve:

Mbylli sytë

Burri i verbër lyp

- 1. Mëkati kundër Perëndisë - zbatim
Asnjëri s'mund ta kurojë verbërinë e tij

- 2. Mëkati - ti s'mund ta largosh atë.

Bartimeu dëgjon për Jezus Krishtin

- 3. Jezusi - vdekja

Jezusi vjen në Jeriko

Bartimeu thërret Jezusin

- 4. Çmimi i të ndjekurit - zbatim

Jezus Krishti e thërret Bartimeun

- 5. Dashuria e Krishtit - zbatim

"Ç'kërkon të bëj për ty?"

- 6. Shpëtimi - zbatim

Kulmi:

Bartimeu mund të shohë

Përfundimi:

Bartimeu u ndryshua

- 7. Shpëtimi - zbatim

Vargu përmendësh:

Vazhdoni të mësoni Filipianët 2:10 "Që në emër të Jezusit të përkulet çdo gju i krijesave (ose gjërave) qiellore, tokësore dhe nëntokësore."

Vënia në dispozicion të nxënësve.

Ky mësim të jep ty një mundësi të shkëlqyer për të prezantuar mesazhin e Ungjillit në një mënyrë të qartë dhe të kuptueshme. Sidoqoftë, mund të ketë fëmijë të cilët duke dëgjuar mësimin përsëri do të dëshirojnë të bëjnë pyetje rreth shpëtimit. Unë sugjeroj që nga mesi i mbledhjes të këndoni së bashku këngën. "Sytë e verbër Jezusi i bëri të shohin." Thuaju fëmijëve, "Në mësimin e sotëm ne do të takojmë dikë i cili erdhi tek Jezusi dhe u shërua. Por zemra jote mëkatore është më serioze se çdo sëmundje tjetër. Ti ke nevojë të shkosh tek Jezusi që mëkati yt të lahet. Mësimi do të të tregojë mënyrën, por në qoftë se ke përsëri pyetje rreth mënyrës si shkojmë tek Perëndia, eja në fund të takimit dhe më trego (caktoni një vend). Unë do të jem shumë i lumtur të tregoj përgjigjet nga Bibla. Është shumë e rëndësishme të vish tek Jezusi që mëkati yt të falet. Tani le të këndojmë përsëri këngën."

Shënim mësuesit:

Në qoftë se keni klasë të cilën e kontrolloni me vështirësi, është më mirë të mos përdorni hyrje por të filloni me Figurën 1.

Mësim

Mbyllni sytë, të gjithë, derisa të numëroj në dhjetë.
(Mësuesi numëron ngadalë.)

Çfarë mund të shihni me sytë të mbyllur fort? Asgjë. A mendoni se mund ta gjenit rrugën tek unë me sytë të mbyllur? Mbase mund ta kishit bërë këtë, sepse ju e dinit ku po qëndroja.

(Zgjidhni një fëmijë.)

Gimi, a mund të të lidh sytë?

(Lidhni sytë fëmijës dhe çojë në anën tjetër të sallës.)

Tani, Gimi, unë po largohem nga ti. Unë nuk do të flas; unë do të lëviz pa zhurmë dhe ti do të më gjesh. Unë do t'i bëj me shenjë të tjerëve të të thonë kur të jem gati.

(I jepni fëmijës pak kohë të përpiqet t'ju gjejë; sigurisht është pothuajse e pamundur për të sepse ju gjithmonë mund të lëvizni larg tij. Ndalojeni dhe mos ia hiqni lidhësen e syve.)

Çfarë i nevojitet Gimit për të më gjetur? Po, ai ka nevojë që lidhësja të hiqet. Tani Gimi mund të shohë - ai nuk është më në errësirë. Me të vërtetë është shumë e vështirë të imagjinojmë jetën gjithmonë në errësirë. Por ky njeri e dinte se si jetohej në errësirë.

(Figura 5-1)

Ai ishte ulur në anë të rrugës, jashtë qytetit Jeriko. Ishte një qytet i bukur, por burri nuk mund të shihte palmat e larta që tundeshin nga flladi. Ai nuk mund të shihte kopshtet me trëndafila dhe lulet e tjera që lulëzonin ngado në qytet.

"Ai mund të thithte aromën e balsamit dhe të atyre luleve të mrekullueshme që rriteshin aty pranë, por ai nuk mund t'i shihte ato. Ai ishte i verbër. Ai ishte jo vetëm i verbër, por edhe i varfër. Të verbrit nuk mund të punonin në ato kohe.

Sot një njeri i verbër mund të bëjë shumë gjëra. Ai mund të mësojë të lexojë. Si mund të lexojë një i verbër? Ai lexon duke prekur ca xhunga të vogla në një letër. Ky lloj të shkrimi është quajtur ("Brej").

(Mësues, do të ishte mirë t'u tregosh fëmijëve ca shkrime "Brej".)

Një i verbër mund të mësojë të shtypë dokumente apo të bëjë shumë gjëra me duart e tij. Por në kohën kur jetonte ky njeri, një i verbër zakonisht mund të bënte vetëm një gjë. Ai mund të lypete. Bibla na tregon se ky lypës i verbër quhej Bartimeu.

A e di se Bibla gjithashtu thotë se në qoftë se nuk je i shpëtuar, ti je si Bartimeu - jeta jote është në errësirë? Unë e di se ç'po mendon: ti mendon se nuk je në errësirë - ti mund të shohësh. Patjetër ti mundesh, por errësira për të cilën po flas është mëkati - mosbindja ndaj urdhrave të Perëndisë.

Mëkati yt e mërzit shumë Perëndinë. A të kujtohet se kur po humbisje në lojën e bilardos, e përdore emrin e Perëndisë si sharje, vetëm se humbe kupën? Perëndia të urdhëron: "Mos e përdor kot emrin e Zotit, Perëndisë tënd." Apo se nuk të pëlqen ai djali në klasë, vetëm se ai ka një biçikletë më të mirë se jotja? Perëndia thotë: "Nuk do të dëshirosh të kesh ...," por ti me të vërtetë dëshiron të kesh atë biçikletë të modës sesa biçikletën tënde të zakonshme. Kur ti nuk u bindesh këtyre urdhrave apo urdhrave të tjera të Perëndisë, ti mëkaton dhe Perëndia thotë se mëkati është si errësira. Perëndia kurrë nuk mund të lejojë mëkatin atje ku është Ai, sepse Ai thotë në Bibël, "Perëndia është dritë dhe në Të nuk ka kurrfarë errësirë." Perëndia është i përkryer dhe pa mëkat. Kështu në qoftë se jeta jote është mbushur me errësirë e mëkati, ti je shumë larg nga Perëndia dhe kurrë nuk do të jetosh në Qiell me Të. Kjo është shumë serioze, sepse ti gjendesh në një errësirë shumë më të keqe se çdo lloj verbërie.

Verbëria është një pengesë e madhe. Jeta është krejt e ndryshme për njerëzit e verbër. Jeta e Bartimeut duhet të ketë qenë kështu: çdo ditë ai ulej në anë të rrugës që të çonte në qytet. Emri i qytetit ishte Jeriko. Rruga kishte shumë lëvizje, shumë udhëtarë, pasi rruga shtrihej deri në Jerusalemin.

Çdo ditë ai ulej dhe thërriste aq sa mundte, "Bakshish!

Bakshish!" Kjo do të thotë, "Ju lutem, më falni diçka. Ju lutem më jepni diçka."

Shumë njerëz kalonin aty pranë. Ndonjëherë gjendej dikush që me mirësjellje i jepte ndonjë monedhë të vogël për ta ndihmuar.

Kur i grumbullohej sasi e mjaftueshme, ai mund të blinte ushqim. Ai ishte i kënaqur që ca njerëz e ndihmonin të merrte ushqim për ta ngrënë, por askush nuk mund ta shpëtonte nga errësira.

Askush nuk mund ta ndihmonte të shihte. E njëjta gjë ndodh edhe me errësirën e mëkatit. Ti nuk mund ta zhdokësh errësirën në të cilën gjendesh. Ka njerëz që përpiqen. Ata mendojnë se mund të bëjnë diçka që t'i ndihmojë për të larguar mëkatit. Ata mendojnë se po të jenë të mirë, apo të thonë lutje çdo ditë, apo të shkojnë në kishë, mëkati i tyre do të lahet. Edhe po të bësh këto gjëra të mira nuk e largon mëkatit. Në qoftë se Perëndia nuk bën diçka për të ta hequr errësirën e mëkatit, jeta jote do të jetë gjithmonë e mbushur nga mëkati. Ti gjithmonë do të jesh nën kontrollin e mëkatit. Ti kurrë nuk mund ta ndihmosh veten - dhe as Bartimeu nuk mundte. Gjithçka që ai mund të bënte ishte të ulej dhe të dëgjonte turmat kur kalonin

(Figura 5-2)

Bartimeu mësoi të dallonte hapat dhe zërat e shumë njerëzve që kalonin përgjatë rrugës. Disa udhëtonin rregullisht në atë rrugë. Ata shpesh duhet ta kenë dëgjuar thirrjen e lypësit të verbër. Si thërriste ai? *(Lejo fëmijët të përgjigjen.)*

Disa u bënë si miq dhe jo vetëm që i jepnin "bakshish" por dhe ndalonin për pak çaste për të folur. Mbase ata i tregonin lajmet e fundit nga Jeriko apo Jeruzalemi.

Ndonjë nga ata shokë duhet t'i ketë treguar për Zotin Jezus. Bartimeu duhet të ketë dashur të dëgjojë gjithçka - për mrekullitë, për ujin e kthyer në verë dhe për njerëzit e shëruar.

Ai duhet të ketë bërë shumë pyetje si, "Kush është ky Zoti Jezus?" "A është Ai Personi që Perëndia premtoi të dërgonte?"

Bartimeu duhet të ketë filluar të besojë se Jezusi nga Nazareti ishte i Vetmi që mund ta ndihmonte. Në qoftë se ai dëshironte të fitonte dritën e syve, Zoti Jezus mund t'ia hiqte errësirën nga sytë. A e di se Zoti Jezus Krisht është gjithashtu i vetmi që mund të heqë errësirën e mëkatit? Ai quajti veten "Drita e botës".

Çfarë donte të thoshte Ai me këtë? Ai donte të thoshte se Ai është i pastër dhe pa mëkat dhe kur Ai vjen në jetën tënde, nga ai moment errësira e mëkatit shkon përgjithnjë. Tani mëkati nuk ka pushtet më mbi ty. Mëkati yt u fal. Jezusi e largon atë plotësisht. Si mund ta bëjë Ai këtë? Ai mund ta bëjë këtë sepse Ai, i vetmi Bir i Perëndisë, vdiq në kryq për të larguar mëkatit. Ai u dënua sikur jeta e Tij të qe mbushur me errësirën e mëkatit. Jeta e Tij në të vërtetë ishte e pastër dhe pa mëkat, por Ai vdiq dhe u ndëshkua nga Perëndia për mëkat. Ai vdiq në kryq në vendin tonë. Ai u ringjall dhe është i gjallë përgjithmonë. Ja përse Ai dhe vetëm Ai mund të largojë errësirën e mëkatit. Ti ke nevojë për Zotin Jezus Krisht, po kështu dhe Bartimeu. Nga ajo ditë i dëshpëruar Bartimeu donte të takonte Jezusin. "Ah sikur ta takoja," mendonte, "unë e di Ai do të më bëjë të shoh."

Por koha kaloi. Bartimeu ishte akoma i verbër dhe i varfër. Ndoshta ai mezi priste për ditët që po vinin. Ishte afuar koha për Festën e Pashkëve. Çdo vit në këtë kohë qindra njerëz udhëtonin për në Jeruzalem. Rruga ishte plot me njerëz. Ata kalonin atje ku ishte ulur dhe ai mund të fitonte më shumë para se zakonisht.

(Figura 5-3)

Duke lypur ai filloi të kuptonte se diçka ndryshonte. Zhurma? Kishte më shumë se zakonisht. Një turmë e madhe dukej se po vinte nga rruga jashtë Jerikos. Ç'po ndodhte? Ai duhet ta zbulonte. Më së fundi dikush e pa dhe i tregoi, "Po vjen Jezusi nga Nazareti."

Jezusi nga Nazareti? Jezusi, Biri i Davidit?

Ai që Perëndia premtoi të dërgonte? Ai që mund t'ia largonte verbërinë?

Ky qe momenti për të cilin Bartimeu kishte pritur.

"Jezus," bërtiti ai. "Jezus, Bir i Davidit, ki mëshirë për mua."

(Figura 5-4)

"Bartimeu, rri urtë!" Ata që kishte afër u mërzitën me të dhe i folën ashpër.

"Rri urtë, mjaft bërtite."

Mbase ata menduan se Jezusi nuk interesohej për lypësit e verbër, kështu u përpoqën ta ndalonin. Mbase shokët e tu do të përpiqen të bëjnë të njëjtën gjë me ty. Po ta marrin vesh se ti do që Jezus Krishti të të largojë mëkatit ndoshta ata do të thonë, "Mos e beso këtë; e gjitha është gënjeshtëri," ose "Ti je i krishterë përderisa shkon në kishë." Ata madje dhe mund të të thonë, "Po i besove, nuk mund të jesh

më shoku ynë." Çfarë duhet të bësh?

Ti duhet të dëgjosh ato që thotë Perëndia dhe të mos i pranosh ato që thonë të tjerët. Bartimeu nuk i përfilli ata që donin që ai të rrinte urtë. Ai bërtiti me zë më të lartë, "Jezus, Bir i Davidit, ki mëshirë për mua!"

Zoti Jezus e dëgjo. Ai ndaloi. Ai po priste. "Ma thërrisni atë njeri," tha Ai. "Thojini të vijë tek Unë. Zoti Jezus i kushtoi vëmendje Bartimeut. Ai e donte atë dhe Ai të do ty gjithashtu. Ti dhe unë, ne nuk e meritojmë dashurinë e Tij. Ai është Drita e Botës - Ai është aq i përsosur dhe i pastër, ndërsa ne jemi në errësirën e mëkatit. A nuk do të habitesh që Ai mund të na dojë? Por Ai na do. Bibla na thotë këtë shumë herë. Ai na fton të vijmë tek Ai. A po të thërret dhe ty sot? Në qoftë se fillon të kuptosh se ke nevojë të vish tek Ai, atëherë është Ai që po të thërret. Ai po të tregon se të do dhe se do të të largojë mëkatin. A do të vish tek Ai? Bartimeu erdhi.

(Figura 5-5)

Ai kurrë nuk kishte qenë kaq i gëzuar. Hodhi pallton dhe kërceu në këmbë. Dikush e drejtoi përmes turmës drejt Zotit Jezus. Ai që mund t'i kuronte verbërinë qëndronte para tij.

"Çfarë kërkon të bëj për ty?" pyeti Zoti Jezus. Si t'i përgjigjej Bartimeu? A t'i kërkonte "bakshish"? A t'i kërkonte mjaft para kështu që kurrë më nuk do t'i duhej të lypte?

Jo! Më shumë se gjithçka tjetër Bartimeu donte të shihte. Ai donte që errësira t'i largohej.

"O Zot, unë dua të shoh," tha ai. Në qoftë se sot Jezusi të pyet nëse kërkon diçka, si do t'i përgjigjesh ti? A do më shumë se gjithçka tjetër të të falen mëkatet? A dëshiron të jetosh një jetë plotësisht të ndryshuar - një jetë që të mos sundohet më nga mëkati? Në qoftë se i kërkon Jezus Krishtit të të falë dhe të të ndryshojë, nuk do të zhgënjehesh. Bartimeu nuk u zhgënjye. Jezusi i tha, "Besimi yt t'i ktheu sytë. Ti beson tek Unë, kështu unë po e largoj verbërinë tënde."

(Figura 5-6)

Sytë e tij menjëherë filluan të punojnë si sytë e njerëzve të tjerë.

Ai shihte!

Ai mund ta shihte Zotin Jezus, turmën, qiellin, gjithçka - ai mund të shihte! Ishte e mrekullueshme - dita më e mrekullueshme e jetës së tij.

Në qoftë se sot i kërkon Zotit Jezus të ta falë mëkatin, kjo do të jetë dita më e mrekullueshme e jetës sate. Ai premton se ata që do t'i kërkojnë t'ua falë mëkatet "nuk do të ecin në errësirë" kurrë më: nuk do të jetosh më nën pushtetin e mëkatit. Ti do të jesh i sigurt se mëkati është larguar dhe se tashmë je gati për të shkuar në qiell pas vdekjes.

Bibla thotë, "Kushdo që beson në Të merr faljen e mëkateve" (Veprat 19:43).

A do t'i kërkosh sot Jezusit të të shpëtojë? Mos u tërhiq. Mos i lejo të tjerët të të ndalojnë. Është më e rëndësishme se gjithçka tjetër në botë. Thuaji Atij, "I dashur Zoti Jezus, errësira e mëkatit ka pushtuar jetën time, të lutem largoje atë."

Ai do ta bëjë këtë, dhe ti kurrë nuk do të jesh më si më parë.

Bartimeu kurrë nuk u bë si më parë. Jeta e tij ndryshoi; ai nuk kishte më nevojë të lypte por ndiqte Jezusin. Jeta do të ndryshojë për ty, kur Jezusi ta largojë errësirën tënde. Ti nuk do të kënaqesh më me gjërat mëkatore. Ti do të duash të bësh një jetë të ndryshme nga mëkatarët; ti do të duash të kënaqesh Perëndinë. Jeta jote do të ndryshohet. Jezus Krishti do të jetë me ty përgjithmonë. A nuk do të vish te Jezusi tani? Eja dhe kërkoji të ta largojë errësirën. Mbaj mend, "Kushdo që beson në Të merr faljen e mëkateve."

Pyetje për të rishikuar mësimin 5

1. Kush u shërua nga verbëria e tij jashtë qytetit të Jerikos? (Bartimeu.)
2. Në qoftë se ndokush nuk e ka Zotin Jezus në jetën e tij, pse ai ose ajo është si Bartimeu? (Jeta e tij apo e saj është e mbushur me errësirën e mëkatit.)
3. Çfarë bënte Bartimeu për të marrë para që të blinte ushqim? (Ai ishte lypës.)

4. Pse Zoti Jezus është i vetmi që mund të lajë mëkatet tona? (Ai, Biri i Perëndisë, vdiq në kryq për mëkatin tonë dhe u ringjall.)
5. Ç'ngjarje e veçantë e vitit po afronte që sillte njerëzit përgjatë kësaj rrugës drejt Jeruzalemit?
(Ishte afruar koha për Pashkët.)
6. Ç'bëri Bartimeu kur mësoi se Zoti Jezus po kalonte aty pranë?
(Ai bërtiti: "Jezus, Bir i Davidit, ki mëshirë për mua.")
7. Si reagues njerëzit ndaj kësaj?
(Ata i thanë të rrinte urtë.)
8. Ç'bëri Zoti Jezus kur e dëgjoi?
(Ai i tha Bartimeut të vinte tek Ai.)
9. Zoti Jezus e pyeti Bartimeun, "Ç'kërkon të bëj Unë për ty?" Si ishte përgjigja e tij? ("Zot, unë dua të shoh.")
10. Cila është gjëja më e rëndësishme që ndonjëri mund t'i kërkojë Zotit Jezus të bëjë për të?
(Që Zoti Jezus t'u falë mëkatet.)

Mësimi 6

Një Grua u Shërua dhe një Vajzë u Ringjall

Shkrimi i Shenjtë:	Marku 5:21-43; Lluka 8:40-56
E vërteta qendrore:	Zoti Jezus i do individët.
Zbatime:	Të pashpëtuar: Ti mund të jesh i sigurt se po të vish tek Ai, Ai do të të shpëtojë. Të shpëtuar: Ai të donte dhe vdiq për ty, dhe gjithmonë do të të dojë dhe do të kujdeset për ty, kështu tregojë Atij të gjitha problemet e tua.
Pikat kryesorë të mësimi:	
Fillimi:	Lumturi në qytet.
Zhvillimi i ngjarjeve:	Gruaja e sëmurë - a do të kujdeset Jezusi? Vajza e sëmurë - a do të kujdeset Jezusi? VQ1 Jairi dhe gruaja kërkojnë Jezusin. VQS2 Jairi takon Zotin. Gruaja e sëmurë shërohet. Jezusi flet me gruan. VQP3, RDK Lajmet për vdekjen e vajzës. "Vajza jote do të jetojë." VQS4 Zoti shkon në dhomën e vajzës. VQP5 "Vajzë e vogël, çohu!" Gëzim në shtëpi. "Jepini të hajë." VQS6, VQP7
Kulmi:	
Përfundimi:	
Vargu përmendesh	<i>Filipianëve 2:11 "Dhe çdo gjuhë të rrëfejë se Jezus Krishti është Zot, për lavdi të Perëndisë Atë."</i>

Mësim

(Figura 6-1)

Sa të lumtur ishin banorët e qytetit të vogël në bregun verior të liqenit. Shumë njerëz i kishin lënë tashmë shtëpitë dhe po qëndronin në breg. Ata po prisnin Dikë, Dikë tepër të veçantë. Lajmet kishin udhëtuar me shpejtësi. Lajmet thoshin se Zoti Jezus po kalonte liqenin drejt qytetit të tyre. Nga një person te tjetri kaluan fjalët, "Po vjen Jezusi."

Edhe një grua e vogël dhe e dobët e dëgjoi mesazhin. Me ngadalë u largua nga shtëpia. Sa e dobët ishte. E kishte shumë të vështirë të ecte. Ajo ishte e sëmurë prej dymbëdhjetë vjetësh. Kishte shkuar në shumë doktorë. Kishte harxhuar shumë para dhe akoma vazhdonte të ishte sëmurë. Me ngadalë dhe me vështirësi u nis e vetme drejt liqenit. Dukej sikur askush nuk kujdesej për të. Çdo njëri vraponte, duke shtyrë përmes turmës si e si për të parë sa më mirë. "A do të kujdeset Jezusi?" duhet të ketë menduar ajo.

Në të njëjtën kohë në një shtëpi tjetër në këtë qytet të vogël të quajtur Kapernaum, një baba dhe një nënë ishin shumë të shqetësuar.

Fëmija e tyre e vetme, një vajzë dymbëdhjetëvjeçare, ishte shumë sëmurë. Ishte kaq e sëmurë sa po vdiste. Pa dyshim, ata ishin shumë të shqetësuar. Pastaj edhe ata i dëgjuan lajmet, "Po vjen Jezusi." Mbase dhe ata bënë pyetjen, "A do të kujdeset Jezusi?"

A mendoni se Jezusi kujdesej për problemet e tyre? Po, patjetër. Zoti Jezus i do njerëzit. A nuk e tregoi Ai dashurinë e Tij për gruan nga Samaria? A nuk e donte Ai Bartimeun kur të tjerët u përpoqën ta mbanin urtë? Zoti Jezus e la Qiellin që të jetonte në këtë botë dhe që të vdiste në kryq, sepse Ai i donte njerëzit. Ai po vinte në Kapernaum atë ditë sepse Ai i donte njerëzit. Kishte njerëz në Kapernaum që kishin shumë nevojë për Të, si gruaja e sëmurë apo vajza e sëmurë.

Kur babai i vajzës së vogël dëgjoi që Jezusi po vinte, doli me vrap nga shtëpia. Në këtë kohë Jezusi kishte arritur, kishte zbritur nga barka dhe tani ishte mes turmës, e cila po e priste.

(Figura 6-1)

Oh ç'turmë duhej kaluar! Shumë njerëz donin t'i rrinin pranë Zotit Jezus. A do të mundte ai të arrinte pranë Zotit Jezus në kohë? A do të kujdesej Jezusi për problemin e tij?

Diku mes njerëzve që shtyheshin ishte dhe gruaja e pakët dhe e dobët. Ajo nuk kishte fuqi të shtyhej mes turmës. A ishte e mundur që Jezusi të kalonte nëpër qytet pa marrë vesh për të? A do të kujdesej Jezusi? Patjetër Ai kujdesej. Jezusi, Biri i Perëndisë, i do njerëzit. Ai nuk do vetëm turmat e mëdha të njerëzve; Ai do dhe individë Ai do çdonjërin. Në qoftë se Ai është Shpëtimtari yt, Ai ty të do në një mënyrë tepër të veçantë.

Ai të do kaq shumë sa Ai vdiq për ty. Ai të ka bërë që të bësh pjesë në familjen e Perëndisë dhe Ai është i interesuar në gjithçka që ka të bëjë me ty. Problemet e tua mbase nuk i duken shumë të rëndësishme të tjerëve, por Jezus Krisht është i interesuar në çdo problem që ti ke. Cilat janë problemet që ti ke në jetë? A ke ndonjë problem me shokët në shkollë? A ke ndonjë problem me shëndetin? Ç'problem ke? *(Jepu kohë fëmijëve t'i ndajnë.)*

Ai do që ti të shkosh tek Ai dhe t'i tregosh Atij problemet e tua. Ai do të të ndihmojë të kuptosh se ç'duhet të bësh. Bibla thotë: "Gjithë merakun tuaj hidheni mbi Të, sepse Ai merakoset për ju" (1 Pjetër 5:7). Kur ti je i krishterë, ti nuk duhet të jesh në ankth për problemet e tua. Babai i vajzës së vogël kishte një problem dhe ai besonte se Jezusi mund ta ndihmonte.

Ai u shty me ankth mes turmës. Njerëzit kthenin kokën për të parë kush po shtynte. Ata duhet të kenë qenë të habitur kur kanë parë kush ishte. Ata e njihnin. Ai ishte Jairi. Ai ishte një nga udhëheqësit në sinagogën e tyre - ishte pak a shumë si një udhëheqës në një kishë. Shumë nga udhëheqësit në sinagogë nuk kishin kohë për Zotin Jezus. Ata nuk e besonin që Jezusi ishte Biri i Perëndisë, por dukej se Jairi ishte i shqetësuar për ta takuar. Mbase disa njerëz hapën rrugën për ta lënë të kalonte. Kur Jairi e arriti Zotin Jezus, ai ra në gjunjë përpara Tij.

(Figura 6-2)

"Vajza ime po vdes," tha ai. "Eja, vëri duart mbi të që ajo të shërohet dhe të mos vdesë." Jairi iu lut me zjarr Zotit Jezus që ta ndihmonte. Dhe Zoti nuk ngurroi. Ai menjëherë shkoi me Jairin drejt shtëpisë së tij.

Por edhe turma shkoi pas tyre. Ata shtyheshin në çdo anë. Diku mes turmës ishte ajo grua e shkretë e sëmurë. Gjithë kohës ajo mendonte, "Si të arrij tek Ai? Ah vetëm sikur të afrohesha sa t'i prekja mantelin, besoj se do të shërohem." Ajo pa që turma lëvizte në një drejtim të ri nga liqeni. Ato po shkonin drejt qytetit.

(Figura 6-3)

Ajo lëvizi andej nga lëvizi turma dhe papritur e pa veten pranë Zotit. Për një moment u krijua hapësirë dhe menjëherë ajo zgjati dorën dhe preku thekën e mantelit të Tij. Menjëherë u shërua! Ajo e kuptoi që sëmundja e kishte lënë. Ç'gëzim ia mbushi zemrën! Pas dymbëdhjetë vjetësh sëmundjeje ajo ishte shëruar plotësisht.

Papritur Zoti Jezus ndaloi dhe pa përreth. "Kush më preku?" pyeti Ai. "Ç'pyetje e çuditshme," menduan dishepujt. Kështu duhet të ketë menduar edhe Jairi. Ai ishte i shqetësuar për të bijën dhe donte që Jezusi të nxitonte, por Jezusi ndaloi. Dishepujt thanë, "Mësues, turma po shtyhet rreth Teje, dhe Ti pyet 'Kush më preku?' Njerëzit janë kudo. Shumë njerëz duhet të të kenë prekur."

Zoti Jezus shpjegoi që Ai e kishte fjalën për një lloj tjetër prekje - jo një shtypje aksidentale. Ai tha, "Ndjeva që kaloi prej meje fuqi dhe e di se dikush më preku dhe mori ndihmë." A mendoni ju se Zoti Jezus e dinte kush e kishte prekur? Po, sigurisht që Ai e dinte. Si e dinte Ai? Kjo është e saktë. Ai është Perëndia dhe Ai njuh çdo gjë dhe çdonjëri. Mbase edhe kur ka bërë pyetjen "Kush më preku?" syri i Tij ishte tek gruaja. Po pastaj, pse e bëri pyetjen?
(Ju mund të dëshironi të lejoni fëmijët të sugjerojnë përgjigjen.)

Mundet që Ai donte që gruaja të tregonte publikisht që ajo i besonte Atij. Ai gjithashtu duhet të ketë dashur që turma të shihte se Ai ishte i interesuar edhe në nevojat e një gruaje të pakët. Ajo ishte shëruar dhe Jezusi donte që turma ta merrte vesh.

(Figura 6-4)

Gruaja nuk mund të rrinte më pa treguar. Ajo e dinte se nuk mund t'i fshihej Jezusit. Shumë e emocionuar ajo erdhi përpara turmës dhe ra në gjunjë në këmbët e Tij.

"Unë jam ajo që të preku," tha ajo. Atje, përballë gjithë turmës nga qyteti i saj, ajo tregoi historinë e saj. Zoti Jezus i tha, "Bijë, rri e qetë: besimi yt të shëroi. Shko në paqe."

(Figura 6-5)

Ajo kishte besuar se Jezusi mund ta shëronte dhe Ai pikërisht këtë kishte bërë. Jezusi ishte interesuar për të dhe Ai është i interesuar për ty. Ai është thellësisht i shqetësuar që shumë njerëz nuk i besojnë. A je ti një nga ata? Ai e di ç'lloj njeriu je ti. Ai i njuh mendimet e zemëruara apo qëndrimet egoiste që ti u shfaq të tjerëve. A të kujtohet kur bleve atë topin e ri të futbollit, u inatose me shokët dhe nuk i le të luanin me të? Po kur kishte një kuti të madhe me çokollata dhe i mbajta të gjitha për vete, pa i ndarë ato me shokët? Zoti e di që ti je një mëkatar, që ti ke thyer ligjin e Perëndisë, por prapë Ai i do mëkatarët - Ai të do ty. Ai vdiq që të marrë dënimin për mëkatin tënd. Ai do që ti të kthesh rrugë nga mëkati yt dhe të shkosh tek Ai për shpëtim. Mbase ti ke frikë të shkosh; mbase ti mendon, "Në qoftë se shkoj, a do të më pranojë? A jam unë kaq i parëndësishëm apo a jam unë kaq i keq?"

Në Bibël Ai thotë, "atë që vjen tek Unë, Unë nuk do ta nxjerr jashtë kurrë" (Gjoni 6:37). Ai nuk do të të kthejë mbrapsht, në qoftë se ti i kërkon Atij të të shpëtojë. Në qoftë se shkon tek Ai, ti mund të dish se Ai të do në këtë mënyrë të veçantë; ti mund të njohësh dashurinë e veçantë që ka Ai për fëmijët e Tij. Shko tek Ai sot; mos prit më gjatë! Mrekullia më madhështore që mund të të ndodhë është që Zoti Jezus të të shpëtojë nga mëkati.

(RDK) Në qoftë se me të vërtetë do që të shpëtosh nga mëkati, por nuk je i sigurt se si, unë do të kem kënaqësi të bisedoj me ty pas takimit. Vetëm eja dhe ulu në një nga karriget e radhës së parë, pasi të tjerët të kenë ikur. Në këtë mënyrë unë do të shoh se ti dëshiron të dish më tepër rreth besimit në Krishtin dhe të pasurit një jetë të re. Në qoftë se vjen dhe ulesh këtu, unë do t'ju tregoj nga Bibla se çfarë duhet të bësh dhe çfarë Zoti thotë se do ta bëjë.

Gjatë gjithë kësaj kohe, Jairi vetëm mund të rrinte dhe të priste. Ai duhet të ketë dyshuar se si ishte e bija. Ai duhet të ketë dëshiruar që Jezusi të shpejtonte. Papritmas, ndërkohë që Jezusi fliste, dikush erdhi duke u shtyrë mes turmës.

Dikush nga shtëpia e Jairit .Jairit iu duk sikur i pushoi zemra. Ai kishte frikë të dëgjonte mesazhin: "Bija

jote vdiq. S'është nevoja ta shqetësosh më Zotërinë."

I shkreti Jairi! Sa i trishtuar dukej; sa i zhgënjyer ishte tek po kthehej ngadalë për në shtëpi. "Është tepër vonë tani," duhet të ketë menduar. "Mbase po qe se Jezusi nuk do të kishte ndaluar me gruan, ne do të kishim arritur në kohë."

Pastaj Zoti Jezus i foli Jairit. "Mos u frikëso," tha Ai, "Vetëm më beso dhe ajo do të bëhet mirë." Jezusi e donte Jairin dhe Ai e donte bijën e Jairit, e cila tani ishte e vdekur. Jezusi nuk e kishte harruar vajzën kur ndaloi me gruan. Jezusi kurrë nuk harron për asgjë; megjithëse kjo është ajo që bëjmë ne: ndonjëherë ti harron të heqësh lodrat, megjithëse ti premtove ta bëje këtë. Mbase Mami harroi të bëjë për ty atë që ajo premtoi të bënte. Madje edhe kur e duam ndokënd shumë, ne shpesh mund të harrojmë gjërat; por Zoti Jezus kurrë nuk i harron ata që i takojnë Atij. Çdo minutë të çdo dite dhe çdo minutë të çdo nate Ai është i interesuar për ty. Ai është gjithmonë me ty; Ai kurrë nuk i harron problemet e tua. Edhe kur nuk i përgjigjet lutjes sate menjëherë, Ai nuk e ka harruar. Ai gjithmonë bën atë që është më e mira për ty, sepse Ai të do. Ai po bënte ç'ka ishte më e mirë për Jairin, megjithëse Jairi e kishte të vështirë të duronte. A mundej Jairi t'i besonte Jezusit? "Besomë dhe ajo do të bëhet mirë," kishte thënë Zoti Jezus. Jairi u kthye dhe u drejtua shtëpisë.

Zoti Jezus e ndoqi pas. Turma gjithashtu. Të gjithë mezi po prisnin, me ankth, të shihnin ç'do të ndodhte.

Kur arritën në shtëpi, e gjetën atë plot me njerëz. Oh ç'zhurmë që bënin! Njerëz po qanin dhe vajtonin; rënkonin dhe qanin me zë të lartë. "Pushoni, mos bëni më zhurmë," tha Jezusi. "Ajo vetëm po fle." Të gjithë e dinin se vajza kishte vdekur. Si ishte e mundur që Jezusi të thoshte, "Ajo nuk ka vdekur, ajo po fle"? Ata e përqeshën Jezusin. Ç'donte të thoshte Jezusi? Ai donte të thoshte se Ai mund ta zgjonte atë nga vdekja, sikur të kishte qenë në gjumë. Patjetër shumica e njerëzve nuk e besoi këtë. Ai i nxori të gjithë nga shtëpia, përveç Jairit, gruas së tij dhe tre nga dishepujt - Pjetri, Jakobi dhe Gjoni. Të peste shkuan me Jezusin në dhomën e qetë ku prehej vajza e vogël.

Ajo nuk i kishte më mollëzat e kuqe me temperaturë të lartë. Ajo ishte e bardhë dhe e qetë dhe e ftohtë. Jezusi pa drejt saj. Ai e donte atë. A nuk është e mrekullueshme që Bibla na thotë se Zoti Jezus i do fëmijët! Ai është me të vërtetë i interesuar për fëmijët. Ndonjëherë fëmijët kanë ndjesinë se të rriturit nuk i vënë re. Ndonjëherë të rriturit sillen sikur fëmijët nuk janë të rëndësishëm. Një ditë edhe vetë dishepujt menduan se fëmijët nuk ishin të rëndësishëm, por Jezusi ashpër i kujtoi ata se Ai i donte fëmijët. Ai tha, "I lini fëmijët e vegjël të vijnë tek Unë" (Marku 10:14). Ndoshta ti nuk je shumë i madh apo shumë i vjetër, por Jezusi do të të shpëtojë. Ai do që ti të shkosh tek Ai dhe t'i kërkosh Atij të të largojë mëkatin. Në qoftë se ti e bën këtë, ti do ta marrësh vesh se Ai do të të dojë përgjithmonë.

I mrekullueshmi Zoti Jezus zgjati dorën e Tij dhe ngriti dorën e bardhë dhe të pajetë të vajzës së vogël. "Vajzë e vogël, ngrihu," tha Ai. Jairi e pa; gruaja e tij e pa; tre dishepujt gjithashtu e panë. Sytë e vajzës së vogël u hapën dhe u përpëlitën! Ajo shihte përreth sikur të qe zgjuar nga gjumi. Ajo u ngriti nga krevati! Ajo vendosi këmbën mbi dysheme dhe qëndroi në këmbë! Ajo eci - mbase dhe vrapoi - tek Nëna dhe Babai i saj.

(Figura 6-6)

Jairi dhe e shoqja kurrë nuk kishin qenë kaq të habitur, të kënaqur apo të lumtur. "Jepini të hajë diçka," tha Zoti Jezus. Ajo kishte qenë sëmurë për shumë kohë dhe nuk kishte qenë në gjendje të hante. Tani ajo ishte gjallë, mirë dhe shumë e uritur. Imagjinoni, Zoti Jezus mendonte dhe për një detaj si ky. A nuk është e mrekullueshme që Ai shqetësohet edhe kur jemi të uritur!

Djalë a vajzë i krishterë, kurrë mos harro sa shumë të do dhe sa shumë kujdeset Zoti Jezus për ty. Ai kurrë nuk do të pushojë së kujdesuri për ty. Përpiqu të shkruash në një copë letër javën që vjen disa nga mënyrat me të cilat Perëndia tregon kujdesin e Tij për ty. M'i tregoni ato që ke shkruar në fillim të takimit javës tjetër. Mbase një apo dy mund të ndajnë me të gjithë ne një mënyrë me anë të të cilës Perëndia është kujdesur për ty.

Në qoftë se Jezusi nuk është Shpëtimtari yt, a nuk do të shkosh tek Ai sot? Ai i do mëkatarët kaq shumë sa Ai vdiq për të vuajtur dënimin që ata meritonin. Në qoftë se i lutesh Atij pikërisht tani dhe i kërkoni Atij të bëhet Zoti dhe Shpëtimtari yt, Ai do të të shpëtojë dhe do të të dojë përgjithmonë. Ti do ta njohësh kujdesin e Tij për ty çdo ditë.

Pyetje për të rishikuar mësimin 6

1. Kush ishte udhëheqësi i sinagogës që kishte nevojë për Zotin Jezus t'i shëronte të bijën?
(Jairi.)
2. Ç'bëri Zoti Jezus kur Jairi i kërkoi të shkonte me të dhe t'i shëronte vajzën?
(Zoti Jezus menjëherë shkoi me të.)
3. Ç'ndodhi kur turma shtyhej dhe shtypej pas Zotit Jezus në rrugën drejt shtëpisë së Jairit? (Një grua preku thekën e mantelit të Zotit Jezus dhe u shërua.)
4. Ç'tha Zoti Jezus që tregoi se Ai e dinte ç'kishte ndodhur?
(Ai tha, "Kush më preku mua?")
5. Kur Jairi ishte me Zotin Jezus akoma rrugës, ç'lajme të hidhura mori ai?
("Bija jote vdiq.")
6. Kë mori Jezusi me vete tek koka e krevatit të vajzës së vdekur?
(Jairin dhe gruan e tij, Pjetrin, Jakobin dhe Gjonin.)
7. Ç'mrekulli ndodhi në shtëpinë e Jairit?
(Zoti Jezus e ringjalli vajzën e Jairit.)
8. Cila ishte mënyra më e veçantë me të cilën Zoti Jezus tregoi dashurinë e Tij për ne?
(Kur Ai vdiq në kryq për mëkatin tonë.)
9. Cila është mrekullia më madhështore që mund të të ndodhë?
(Mrekullia e Zotit Jezus duke më shpëtuar nga mëkati im.)
10. Sa vjeç ishte vajza e Jairit të cilën Zoti Jezus ringjalli?
(Dymbëdhjetë vjeç.)